

**BOSNA I HERCEGOVINA**  
**FEDERACIJA BOSNE I HERCEGOVINE**  
**Federalna agencija za upravljanje oduzetom imovinom**

**IZVJEŠTAJ**

**O RADU I FINANSIJSKO - MATERIJALNOM POSLOVANJU  
FEDERALNE AGENCIJE ZA UPRAVLJANJE ODUZETOM IMOVINOM  
ZA PERIOD 1. 7 – 31. 12. 2019. GODINE**

## SADRŽAJ

1. UVOD.....	3
2. NADLEŽNOSTI AGENCIJE.....	4
3. RUKOVOĐENJE I ORGANIZACIJA AGENCIJE.....	5
3.1. Rukovođenje.....	5
3.2. Organizacija.....	6
4. STRATEŠKI CILJ – Povećanje učinkovitosti svih procesa koji su direktno ili indirektno vezani za proces upravljanja oduzetom imovinom u skladu s legislativom i dobrom praksom Evropske unije.....	7
4.1. Operativni cilj 1 – Očuvanje vrijednosti oduzete imovine.....	9
4.2. Operativni cilj 2 – Učinkovito postupanje trajno oduzetom imovinom.....	19
4.3. Operativni cilj 3 – Provođenje analiza u području oduzimanja imovinske koristi pribavljene krivičnim djelom.....	30
4.4. Operativni cilj 4 – Unapređenje saradnje i koordinacije između Agencije, pravosudnih organa, policijskih agencija i drugih institucija koje imaju obavezu postupati po odredbama Zakona, kao i drugih pravnih subjekata u Bosni i Hercegovini, te uspostavljanje i unapređenje saradnje s istim ili sličnim agencijama iz zemalja regije i Evropske unije, kao i kontinuirana edukacija uposlenika navedenih institucija koji su direktno u vezi s procesom oduzimanja nezakonito stečene imovinske koristi.....	33
4.5. Operativni cilj 5 – Iniciranje izmjena i dopuna zakonskih i podzakonskih akata i donošenje provedbenih akata koji normativno razrađuju proces oduzimanja i upravljanja nezakonito stečenom imovinom.....	41
5. BUDŽET AGENCIJE.....	44
6. RAČUN POSEBNIH NAMJENA KOJIM UPRAVLJA AGENCIJA.....	45
7. PRIJEDLOG MJERA ZA UNAPREĐENJE RADA AGENCIJE.....	46



Na osnovu člana 29. Zakona o oduzimanju nezakonito stečene imovine krivičnim djelom („Službene novine Federacije BiH“, broj 71/14), a u vezi sa čl. 17. i 18. Uredbe o planiranju rada i izvještavanju o radu Vlade Federacije Bosne i Hercegovine, federalnih ministarstava i institucija („Službene novine Federacije BiH“, br. 89/14 i 107/14), te Zaključka Vlade Federacije Bosne i Hercegovine o usvajanju Plana rada Federalne agencije za upravljanje oduzetom imovinom za 2019. godinu V. broj: 1475/2018 od 12. 12. 2018. godine, direktor Federalne agencije za upravljanje oduzetom imovinom Vladi Federacije Bosne i Hercegovine p o d n o s i

## **I Z V J E Š T A J**

### **O RADU I FINANSIJSKO-MATERIJALNOM POSLOVANJU FEDERALNE AGENCIJE ZA UPRAVLJANJE ODUZETOM IMOVINOM ZA PERIOD 1. 7 – 31. 12. 2019. GODINE**

#### **1. UVOD**

Federalna agencija za upravljanje oduzetom imovinom (u daljem tekstu: Agencija) je nezavisna i samostalna upravna organizacija osnovana Zakonom o oduzimanju nezakonito stečene imovine krivičnim djelom („Službene novine Federacije BiH“, broj 71/14).

Propisi u Federaciji Bosne i Hercegovine koji definiraju ovu oblast, a samim tim utječu na rad Agencije, osim navedenog Zakona o oduzimanju nezakonito stečene imovine krivičnim djelom („Službene novine Federacije BiH“, broj 71/14 - u daljem tekstu: Zakon), su Krivični zakon Federacije Bosne i Hercegovine („Službene novine Federacije BiH“, br. 36/03, 37/03, 21/04, 69/04, 18/05, 42/10, 42/11, 59/14, 76/14 i 46/16 i 75/17), Zakon o krivičnom postupku Federacije Bosne i Hercegovine („Službene novine Federacije BiH“, br. 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13 i 59/14), Zakon o izvršnom postupku Federacije Bosne i Hercegovine („Službene novine Federacije BiH“, br. 32/03, 52/03, 33/06, 39/06, 39/09, 35/12 i 46/16) i Pravilnik o postupku prodaje, najma, čuvanja i održavanja oduzete imovine („Službene novine Federacije BiH“, broj 5/16).

Pitanja koja se odnose na izvršenje novčanih kazni, sankcija za privredne prestupe, prekršajnih sankcija i mjera sigurnosti, a koje nisu regulisane Zakonom o izvršenju krivičnih sankcija u Federaciji Bosne i Hercegovine („Službene novine Federacije BiH“, br. 44/98, 42/99, 12/09 i 42/11), uređena su kantonalnim zakonima.

Na osnovu navedenih zakona i podzakonskih akata, Agencija preuzima i upravlja oduzetom imovinom nezakonito stečenom krivičnim djelom.

Agencija je samostalna federalna upravna organizacija koja ima svojstvo pravnog lica.

Zakon je utvrdio da je sjedište Agencije u Sarajevu.

U okviru svoje nadležnosti Agencija ima javna ovlaštenja za donošenje podzakonskih akata kojima se uređuje način djelovanja Agencije, pa je na osnovu tog ovlaštenja Agencija donijela Odluku o utvrđivanju kriterija obračuna troškova



čuvanja i održavanja privremeno oduzete imovine („Službene novine Federacije BiH“, broj 60/16), Uputstvo o načinu provođenja postupka javnog nadmetanja prodaje trajno oduzete imovine („Službene novine Federacije BiH“, broj 57/16) i Uputstvo o uspostavi, vrsti i sadržaju evidencija o upravljanju i raspolaganju nezakonito stečenom imovinom krivičnim djelom („Službene novine Federacije BiH“, broj 2/17).

Na radnopravni status osoba zaposlenih u Agenciji primjenjuju se odredbe Zakona o državnoj službi u Federaciji Bosne i Hercegovine („Službene novine Federacije BiH“, br. 29/03, 23/04, 39/04, 54/04, 67/05, 8/06, 4/12, 99/15 i 9/17 - Presuda Ustavnog suda Federacije BiH, broj U-13/16), Zakona o namještenicima u Federaciji Bosne i Hercegovine („Službene novine Federacije BiH“, broj 49/05), Zakona o radu („Službene novine Federacije BiH“, br. 26/16 i 89/18) i Kolektivnog ugovora za službenike organa uprave i sudske vlasti u Federaciji Bosne i Hercegovine (Službene novine Federacije BiH, broj 16/18).

## 2. NADLEŽNOST AGENCIJE

Nadležnosti Agencije utvrđene su članom 30. Zakona i to:

- upravljanje privremeno oduzetom i oduzetom imovinom po odredbama Zakona i drugih zakona;
- provođenje analiza u području oduzimanja imovinske koristi pribavljene krivičnim djelom;
- stručna edukacija iz područja finansijskih istraga i oduzimanja imovinske koristi pribavljene krivičnim djelom i
- obavljanje i drugih poslova propisanih Zakonom.

Agencija u provođenju svojih nadležnosti obavlja sljedeće poslove:

- skladišti, čuva, prodaje, vrši najam imovine oduzete na osnovu Zakona. Ako za to postoji opravdana potreba, ovu imovinu Agencija može povjeriti na čuvanje drugoj instituciji o čemu se zaključuje poseban ugovor;
- vrši stručnu procjenu vrijednosti privremeno oduzete i oduzete imovine po odredbama ovog i drugih zakona;
- vodi evidencije o imovini kojom raspolaže i upravlja, sudskim postupcima u kojima se odlučuje o takvoj imovini;
- prikuplja od nadležnih institucija podatke, statističke izvještaje i druge informacije iz pravomoćno okončanih postupaka za oduzimanje imovinske koristi u skladu sa Zakonom, s ciljem obrade i analize tih podataka i informacija, uočavanja trendova u vršenju krivičnih djela iz kojih se pribavlja imovinska korist;
- prikuplja informacije iz sudskih registara, Porezne uprave, Registra vrijednosnih papira i drugih javnih registara koji se tiču vlasništva nad imovinom;
- vrši analize i procjene rizika sa ciljem identifikacije faktora i okolnosti koji pogoduju pribavljanju imovinske koristi iz vršenja krivičnih djela;
- objavljuje redovne i godišnje izvještaje o stanju u oblasti oduzimanja imovinske koristi pribavljene krivičnim djelom, te ih dostavlja Vladi Federacije Bosne i Hercegovine (u daljem tekstu: Vlada Federacije BiH) i Parlamentu Federacije Bosne i Hercegovine (u daljem tekstu: Parlament Federacije BiH);



- obavještava Vladu Federacije BiH i Parlament Federacije BiH o rezultatima analiza u području provođenja zakona ili drugih propisa o finansijskim istragama i oduzimanju imovinske koristi pribavljene krivičnim djelom;
- inicira i daje preporuke za unapređenje pravnih propisa u oblasti provođenja finansijskih istraga i oduzimanja imovinske koristi pribavljene krivičnim djelom;
- sačinjava prijedlog Strategije za oduzimanje imovinske koristi pribavljene krivičnim djelom u Federaciji Bosne i Hercegovine (u daljem tekstu: Strategija) i Akcionog plana za njeno izvršenje, te ih upućuje Vladi Federacije BiH i Parlamentu Federacije BiH na usvajanje;
- koordinira i prati provođenje Strategije i Akcionog plana, te daje mišljenja i preporuke za njihovo efikasnije provođenje i
- u saradnji s drugim nadležnim institucijama učestvuje u obuci državnih i policijskih službenika i nosilaca pravosudnih funkcija u vezi s finansijskim istragama i oduzimanjem imovinske koristi pribavljene krivičnim djelom.

Agencija poslove iz svoje nadležnosti obavlja samostalno u granicama ovlaštenja utvrđenih Zakonom i drugim propisima, te u okviru raspoloživih finansijskih sredstava i odobrenog broja izvršilaca od strane Vlade Federacije Bosne i Hercegovine.

### **3. RUKOVOĐENJE I ORGANIZACIJA AGENCIJE**

Rukovođenje Agencijom je utvrđeno u članu 26. st. (2) i (3) Zakona, dok su ovlasti direktora, poslovi organizacionih jedinica i ostala pitanja vezana za organizaciju, upravljanje i rukovođenje organizacionim jedinicama utvrđeni Pravilnikom o unutrašnjoj organizaciji Federalne agencije za upravljanje oduzetom imovinom na koji je Vlada Federacije BiH dala saglasnost Odlukom V. broj: 454/19 od 9. 5. 2019. godine („Službene novine Federacije BiH“, broj 31/19), kao i drugim pravilnicima i aktima koji se odnose na radne odnose i cjelokupno funkcionisanje Agencije.

#### **3.1. Rukovođenje**

Po Pravilniku o unutrašnjoj organizaciji Federalne agencije za upravljanje oduzetom imovinom, rukovodna radna mjesta su:

- direktor Agencije;
- sekretar Agencije;
- pomoćnik direktora u Sektoru za preuzimanje i upravljanje oduzetom imovinom;
- pomoćnik direktora u Sektoru za analizu, planiranje i informisanje i
- pomoćnik direktora u Sektoru za pravne, kadrovske, opće i materijalno finansijske poslove.

Na kraju izvještajnog perioda popunjena rukovodna radna mjesta su direktor Agencije, koji rukovodi radom Agencije i vrši poslove utvrđene članom 28. Zakona, sekretar Agencije, pomoćnik direktora u Sektoru za preuzimanje i upravljanje oduzetom imovinom i pomoćnik direktora u Sektoru za analizu, planiranje i informisanje.


U ovom izvještajnom periodu došlo je do promjene direktora, tako što je dosadašnjem direktoru gosp. Kenanu Kapi istekao mandat na koji je imenovan.



Vlada Federacije Bosne i Hercegovine na svojoj 190. sjednici, održanoj 12. 9. 2019. godine donijela je Rješenje broj: 1016/19 kojim je privremeno postavila novog direktora.

### 3.2. Organizacija

Pravilnikom o unutrašnjoj organizaciji Agencije, predviđeno je da poslove i zadatke izvršava 25 uposlenika, organizovanih u tri organizacione jedinice i to:



**Grafikon 1:** Organizaciona shema Agencije

Agencija poslove iz svoje nadležnosti obavlja samostalno u granicama ovlaštenja utvrđenih Zakonom i drugim propisima, te u okviru raspoloživih finansijskih sredstava i odobrenog broja izvršilaca od strane Vlade Federacije Bosne i Hercegovine.

Na kraju ovog izvještajnog perioda poslove i zadatke u Agenciji obavlja 16 uposlenih, te iako to predstavlja 64% od ukupnog broja sistematizovanih radnih pozicija, postoje određeni problemi vezani za unutrašnju organizaciju i sistematizaciju, kao i trenutnu popunjenost radnih mjesta u Agenciji.

Naime, kadrovska popunjenost sektora Agencije ne odgovara stvarnim potrebama i radnim zadacima koje Agencija obavlja u okviru svojih nadležnosti. U trenutku izvještavanja u Agenciji je uposleno samo dvoje državnih službenika sa završenim ekonomskim fakultetom, od kojih je jedna osoba rukovodeći državni službenik, odnosno pomoćnik direktora koji je zadužen za rukovođenje Sektorom za preuzimanje i upravljanje oduzetom imovinom u okviru kojeg se, između ostalog, upravlja i privrednim subjektima.

U ovom sektoru trenutno su zaposleni državni službenici na poziciji stručnog savjetnika sa školskom spremom dipl. pravnik, dipl. kriminalist i dipl. politolog, što trenutno ne odgovara stvarnim zahtjevima Agencije, naročito u kontekstu upravljanja privrednim subjektima.



U Sektoru za analizu, planiranje i izvještavanje trenutno je uposlena samo jedna osoba i to rukovodeći državni službenik na poziciji pomoćnika direktora tog sektora.

Kako u sistematizaciji postoji predviđeno radno mjesto prevodioca, a s obzirom na sve veći broj zahtjeva od strane međunarodnih institucija i organizacija koje se tiču oduzimanja nezakonito stečene imovine krivičnim djelom, a koje rezultiraju velikim brojem sastanaka sa istim, te mnogobrojnih projekata finansiranih od strane Evropske unije, kao i članstva u Međuagencijskoj balkanskoj mreži za upravljanje oduzetom imovinom, potrebno je izvršiti popunu ovog radnog mjesta.

Također, Direktiva Evropskog parlamenta i Vijeća Evrope 2014/42/EU o zamrzavanju i oduzimanju predmeta i imovinske koristi ostvarene krivičnim djelima u Evropskoj uniji od 3. 4. 2014. godine, nalaže prikupljanje, obradu i objavljivanje podataka o nezakonito stečenoj imovini krivičnim djelom, te u skladu s tim Agencija provodi navedene aktivnosti u saradnji sa svim sudovima i tužilaštvima u Federaciji Bosne i Hercegovine, kao i Visokim sudskim i tužilačkim vijećem. Kako trenutno s istim provodimo zajedničke aktivnosti oko informatičke uvezanosti u vezi navedenih podataka, neophodno je da se obezbijede licence za korištenje informacionih sistema, kao i popuniti upražnjeno radno mjesto informatičara.

Pored gore navedenog, u Sektoru za pravne, kadrovske, opće i materijalno-finansijske poslove neophodno je izvršiti popunu upražnjenih radnih mjesta predviđenih važećim Pravilnikom koji se odnose na pravne i ekonomske poslove, a s ciljem adekvatne podrške u obavljanju stručnih poslova koji se odnose na upravljanje oduzetom imovinom.

Akcionim planom za realizaciju prioriteta iz Analitičkog izvještaja Evropske komisije, federalne institucije nadležne za finansijske istrage i oduzimanje imovinske koristi su predvidjele povećanje istih, što će prouzrokovati i povećanju obima posla Agencije u kontekstu upravljanja oduzetom imovinom, naročito u kontekstu upravljanja privrednim subjektima.

Shodno navedenom, potrebno je važeći Pravilnik o unutrašnjoj organizaciji Agencije prilagoditi novonastalim potrebama, te izvršiti preraspodjelu trenutno uposlenih, kao i izvršiti novo zapošljavanje adekvatnog stručnog osoblja.

#### **4. STRATEŠKI CILJ**

Federalna agencija za upravljanje oduzetom imovinom u skladu sa svojim nadležnostima ima za cilj održati vrijednost privremeno ili trajno oduzete imovine, koji se javlja kao imperativ u okviru postupka za oduzimanje imovinske koristi, gdje je naglašen princip „pažnje dobrog domaćina“, provođenje analiza u području oduzimanja imovinske koristi pribavljene krivičnim djelom, kao i stručnu edukaciju iz područja finansijskih istraga i oduzimanja imovinske koristi pribavljene krivičnim djelom.

U skladu s navedenim nadležnostima, Agencija je Planom rada za 2019. godinu definisala jedan strateški cilj - **Povećanje učinkovitosti svih procesa koji su direktno ili indirektno vezani za proces upravljanja oduzetom imovinom u**




skladu s legislativom i dobrom praksom Evropske unije, čije ostvarenje su u izvještajnom periodu podržavale aktivnosti iz pet operativnih ciljeva, i to:

1. Očuvanje vrijednosti oduzete imovine;
2. Učinkovito postupanje trajno oduzetom imovinom;
3. Provođenje analiza u području oduzimanja imovinske koristi pribavljene krivičnim djelom;
4. Unapređenje saradnje i koordinacije između Agencije, pravosudnih organa, policijskih agencija i drugih institucija koje imaju obavezu postupati po odredbama Zakona, kao i drugih pravnih subjekata u Bosni i Hercegovini, te uspostavljanje i unapređenje saradnje sa istim ili sličnim agencijama iz zemalja regije i Evropske unije, kao i kontinuirana edukacija uposlenika navedenih institucija koji su direktno u vezi s procesom oduzimanja nezakonito stečene imovinske koristi i
5. Iniciranje izmjena i dopuna zakonskih i podzakonskih akata i donošenje provedbenih akata koji normativno razrađuju proces oduzimanja i upravljanja nezakonito stečenom imovinom.

Navedene aktivnosti Agencije koje su realizovane u izvještajnom periodu su u skladu sa Godišnjim planom rada Agencije za 2019. godinu, koji se temelji na viziji Agencije da u toku 2019. godine unaprijedi sistemski, koordinirano i transparentno upravljanje oduzetom imovinom stečenom izvršenjem krivičnog djela.

Agencija je u izvještajnom periodu postupala po 30 sudskih odluka i to 19 sudskih presuda u kojima je krivični postupak okončan i deset sudskih rješenja u kojima je krivični postupak još uvijek u toku, te zaprimila jednu sudsku naredbu kojom se privremeno oduzeti predmeti predaju Agenciji na čuvanje i upravljanje.

Vrijednost imovine kojom je Agencija upravljala u periodu juli – decembar 2019. godine iznosi **14.352.913,58** konvertibilnih maraka, a radi se o oduzetim novčanim sredstvima, dionicama, nekretninama, hotelu, studentskom domu, benzinskoj pumpi, motornim vozilima, građevninskom materijalu i drugo.



**Grafikon 2:** Vrsta imovine kojom je Agencija upravljala u izvještajnom periodu



Agencija je, u okviru svojih zakonskih ovlasti i obaveza, kao i učinkovitog izvršavanja povjerenih poslova, u sklopu planiranog strateškog cilja i operativnih ciljeva za 2019. godinu realizovala sljedeće aktivnosti:

#### **4.1. OPERATIVNI CILJ 1 – OČUVANJE VRIJEDNOSTI ODUZETE IMOVINE**

Privremeno oduzetom imovinom upravlja Agencija nakon što nadležni sud donese rješenje o mjeri osiguranja koja sadrži i mjeru privremenog oduzimanja imovine. U tom slučaju Agencija ima obavezu da takvu imovinu preuzme, izvrši njenu procjenu, te dostavi povratnu informaciju sudu koji je donio takvo rješenje.

Agencija nakon preuzimanja, odmah donosi odluku koji je najbolji način čuvanja i upravljanja privremeno oduzetom imovinom, odnosno koji je najbolji način da se očuva njena vrijednost.

U skladu sa svojim nadležnostima Agencija je u izvještajnom periodu, po zaprimljenim sudskim odlukama, poduzela sljedeće aktivnosti na očuvanju vrijednosti privremeno oduzete imovine:

##### **Upravljanje privrednim društvima**

Postupajući po **Rješenju Kantonalnog suda u Sarajevu, broj 09 0 K 026779 16 Kps od 12. 1. 2017. godine**, prema optuženim licima su izrečene privremene mjere osiguranja imovinske koristi i to zabrana otuđenja i opterećenja osnivačkih udjela - osnivačkih kapitala privrednih društava **UMAX GROUP d.o.o. Sarajevo – benzinska pumpa, Emiran d.o.o. Sarajevo i Emiran Studentski dom - Univerzitetski hotel d.o.o. Sarajevo - hoteli**, Agencija je kao i u dosadašnjim izvještajnim periodima, putem direktora imenovanih od strane Agencije, nastavila svoje poslovanje na tržištu.

U svrhu očuvanja vrijednosti i staranja o zaštiti interesa vlasnika imovine, savjesnih držalaca i lica kojima je u skladu sa Zakonom oduzeta imovina, a koji su povjereni Agenciji na upravljanje, Agencija je od strane direktora privrednih društava zapimala mjesečne izvještaje o radu privrednih društava, te vršila redovne fizičke obilaske privrednih društava i na taj način se upoznavala s eventualnim problemima u poslovanju, budućim planovima s ciljem da privredna društva posluju pozitivno i u skladu sa zakonskim propisima.

I dalje je poseban fokus bio na jačanju funkcija prodaje i marketinga, vraćanju povjerenja kupaca i dobavljača, ponude šireg asortimana robe koja bi vremenom dovele do povećanja profitne margine, te saniranja prije svega obaveza preuzetih iz ranijeg perioda kako bi se stabiliziralo poslovanje i redovno izmirivale tekuće obaveze. Još uvijek se radilo na iznalaženju najboljih mogućih organizacionih rješenja, kao i postavljanju adekvatnih kadrova koji će uspješno upravljati procesima rada.

Od trenutka preuzimanja privrednih društava, Agencija se susreće sa trendom da društva imaju poteškoće u poslovanju, koje se prvenstveno vežu za krivični postupak koji je u toku protiv vlasnika od kojih su privredna društva oduzeta i preuzetim problemima, kao i neriješenim imovinsko-pravnim pitanjima u prethodnom periodu.



Ono što je bitno istaći je da su privredna društva u ovom izvještajnom periodu poduzela neophodne aktivnosti kako bi se trend negativnog poslovanja i problema sa kojima su se susretala u dosadašnjem radu zaustavio, te kako bi se unaprijedilo poslovanje privrednih društava.

Tako je zbog odstupanja od planiranih rezultata i plana rada dostavljenih Agenciji od strane direktora privrednih društava, Agencija izvršila promjenu lica ovlaštenih za zastupanje istih, te su, umjesto dosadašnjih, imenovani direktore koji bi trebalo da poboljšaju poslovanje privrednih društava. Naime, s obzirom da je isto lice bilo direktor u sva tri privredna društva, te kako su dva privredna društva kojim je rukovodio ostvarila gubitak u poslovanju, kao i da je isto lice imalo u najmanju ruku nekorektan odnos, te vrijeđao službenike Agencije, donesena je odluka kojom se dosadašnji direktor privrednih društava razrješava dužnosti, a imenovana su nova lica.

Treba naglasiti da od momenta preuzimanja privrednih društava od strane Agencije postoji veliki problem jer društva ne raspolažu računovodstvenom dokumentacijom iz ranijih perioda, neriješeni su izvodi otvorenih stavki dobavljača i kupaca, date su pozjammice prema fizičkim licima za koje ne postoje ugovori u arhivama privrednih društava, dugovanja prema dobavljačima o kojima ne postoji trag u okviru knjigovodstvene evidencije, potraživanja prema nepostojećim kupcima, nepostojanje stanja zaliha i neadekvatna evidencija istih, nepravilno vođenje knjigovodstvenih evidencija i slično. Navedeno su potvrdile revizije finansijskih izvještaja na dan 31. 12. 2018. godine za sva privredna društva gdje je iskazano suzdržano mišljenje iz razloga nepostojanja dokumentacije o početnim stanjima u knjigovodstvenim evidencijama, kao i nedostatku ostale poslovne dokumentacije kojom se dokazuju nastale poslovne promjene, a sve za period prije nego je Agencija preuzela upravljanje privrednim društvima, o čemu smo u više navrata obavještavali Kantonalni sud u Sarajevu i Kantonalno tužilaštvo Kantona Sarajevo, kao institucije uključene u ovaj predmet.

S upraviteljima društava, u izvještajnom periodu, održani su mnogobrojni sastanci na kojima se raspravljalo o problemima u radu i pravilnom usmjeravanju resursa privrednih društava, a sve s jednim osnovnim ciljem - da društva posluju pozitivno. Također, direktorima je sugerirano da slijede nalaze nezavisnog revizora, te da se fokusiraju na stavke koje se mogu ispraviti.

Agencija je u izvještajnom periodu, od računovodstveno-knjigovodstvene agencije, koja je pružala usluge predmetnim pravnim licima u periodu prije nego je Agencija odlukom suda preuzela upravljanje istim, zatražila dostavu svih finansijskih i poslovnih dokumenata koje je predmetna agencija vodila za Emiran d.o.o. Sarajevo i Emiran Studentski dom – Univerzitetski hotel d.o.o. Sarajevo, a sve kako bi se Agencija detaljnije upoznala s historijatom pravnih lica, te njihovim poslovanjem na tržištu, ali i kako bi se buduće poslovanje pospješilo. Navedena agencija nije dostavila tražene dokumente, te je o navedenom obaviješten sud kako bi isti, ukoliko ocijeni potrebnim, mogao poduzeti odgovarajuće radnje.

Zadatak Agencije prilikom upravljanja privrednim društvima pod privremenom mjerom osiguranja i jeste da ih održi u radu, u smislu da ista posluju u skladu sa zakonskim normama, da obaveze prema povjeriocima i državi budu redovno



servisirane, čime se stvaraju ekonomski uslovi za nastavak poslovanja, te da održi vrijednost privremeno povjerene imovine Agenciji na upravljanje.

S obzirom na to da je u privrednom društvu Emiran d.o.o. neriješeno imovinsko pravno stanje objekta hotela koji nije upisan u zemljišno-knjižni izvadak, Agencija je u suradnji sa upravom privrednog društva pokrenula postupak kupovine parcele koja graniči s parcelom u vlasništvu privrednog subjekta, u vlasništvu Kantona Sarajevo, kako bi u se konačno finalizirao postupak tehničkog prijema objekta i izvršen upis objekta u zemljišne knjige. Bitno je napomenuti da je ovaj problem postojao i prije nego je Agenciji dato na upravljanje privredno društvu.

Nakon što je ovlaštenu sudski vještak građevinske struke izvršio procjenu parcele koju je privredno društvo trebalo kupiti i nakon što su pribavljena sva potrebna mišljenja resornog ministarstva i Vlade Kantona Sarajevo, Pravobranilaštva Kantona Sarajevo, na predloženi kupoprodajni ugovor, kao i saglasnost Agencije za kupovinu iste, Skupština Kantona Sarajevo je na redovnoj sjednici donijela Zaključak o odbijanju Odluke o prodaji zemljišta u vlasništvu Kantona Sarajevo privrednom društvu Emiran d.o.o.

Informaciju o končanom poslovnom rezultatu privrednih društava za 2019. godinu Agencija nije u mogućnosti dostaviti u ovom izvještaju iz razloga što je zakonski rok za izradu i predaju finansijskih izvještaja privrednih društava za navedeni period 29. 2. 2020. godine.

### **Upravljanje pokretnim stvarima**

Agencija u okviru svoje nadležnosti, između ostalog, upravlja privremeno i trajno oduzetim pokretnim stvarima u skladu sa Zakonom. U tom smislu, u izvještajnom periodu Agencija je postupala po sljedećim rješenjima:

#### **Rješenje Kantonalnog suda u Sarajevu broj 09 0 K 026779 16 Kps od 12. 1. 2017. godine**

Rješenjem Vrhovnog suda Federacije Bosne i Hercegovine broj 09 0 K 026779 18 Kž 32 od 17. 1. 2019. godine – zaprimljeno 1. 2. 2019. godine, produžena je mjera osiguranja imovinske koristi za motorno vozilo **BMW X6** i to zabrana otuđenja, skrivanja, opterećenja ili raspolaganja predmetnim vozilom i povjeravanje istog Agenciji na upravljanje do 17. 1. 2020. godine ili do druge odluke Suda. Navedenim rješenjem produžena je prvobitno određena mjera izrečena Rješenjem Kantonalnog suda u Sarajevu broj 09 0 K 026779 16 Kps od 12. 1. 2017. godine. Predmetno motorno vozilo je u 2017. godini preuzeto i deponovano u skladište Agencije.

U 2018. godini izvršena je procjena putničkog motornog vozila od strane sudskog vještaka na 71.701,59 KM, te je izvršeno i osiguranje vozila kod osiguravajućeg društva Triglav osiguranje d.d.

U izvještajnom periodu su poduzete aktivnosti usmjerene ka redovnom održavanju i provjeri ispravnosti motornog vozila, i to: provjera tekućine u vozilu, provjera nivoa motornog ulja, provjera nivoa rashladne tečnosti, provjera nivoa tečnost za vjetrobransko staklo, provjera ispravnosti baterije za startanje vozila-



akumulatora i ocjenu općeg stanja vozila, a sve navedeno izvršila su ovlaštena i stručna lica BIHAMK ASISTENCIJA d.o.o. koja navedene usluge pruža Agenciji u skladu s Ugovorom. Ovlašteno servis je zamijenio neispravn akumulator.

#### **Rješenje Kantonalnog suda u Bihaću broj 01 0 K 013572 18 Kpp od 23. 4. 2018. godine**

Predmetnim Rješenjem Kantonalnog suda u Bihaću, Agenciji je povjereno na čuvanje i upravljanje putničko motorno vozilo marke **VW tip Polo**, VIN: WWZZZ9NZ6D091589, 2006 godište. Predmetno motorno vozilo je preuzeto 26. 4. 2018. godini, te nakon obavljenog tehničkog i vizuelnog pregleda ovlaštenog servisa BIHAMK-a deponovano u skladište Agencije. U 2018. godini sudski vještak je procijenio vrijednost putničkog motornog vozila na iznos od 5.150,34 KM, te je izvršeno i osiguranje vozila kod osiguravajućeg društva Triglav osiguranje d.d.

U izvještajnom periodu su poduzete aktivnosti usmjerene ka redovnom održavanju i provjeri ispravnosti motornog vozila, i to: provjera tekućine u vozilu, provjera nivoa motornog ulja, provjera nivoa rashladne tečnosti, provjera nivoa tečnost za vjetrobransko staklo, provjera ispravnosti baterije za startanje vozila-akumulatora i ocjenu općeg stanja vozila, a sve navedeno su izvršila ovlaštena i stručna lica BIHAMK ASISTENCIJA d.o.o. koja navedene usluge pruža Agenciji u skladu s Ugovorom.

#### **Rješenje Općinskog suda u Zavidovićima broj 42 0 K 043209 18 Kpp 3 od 23. 10. 2018. godine**

Predmetnim Rješenjem Općinskog suda u Zavidovićima, Agenciji je povjereno na čuvanje i upravljanje putničko motorno vozilo marke **Mercedes Benz** tip CLS 320 CDI, VIN: XDD2193221A109942, reg.oznaka J87-O-968. Predmetno motorno vozilo je 25. 10. 2018. godini preuzeto, te nakon obavljenog tehničkog i vizuelnog pregleda od strane ovlaštenog servisa BIHAMK-a deponovano u skladište Agencije. U 2018. godini izvršena je procjena vrijednosti putničkog motornog vozila od strane sudskog vještaka na iznos od 26.346,56 KM, te je izvršeno je i osiguranje vozila kod osiguravajućeg društva Triglav osiguranje d.d.

U izvještajnom periodu su poduzete aktivnosti usmjerene ka redovnom održavanju i provjeri ispravnosti motornog vozila, i to: provjera tekućine u vozilu, provjera nivoa motornog ulja, provjera nivoa rashladne tečnosti, provjera nivoa tečnost za vjetrobransko staklo, provjera ispravnosti baterije za startanje vozila-akumulatora i ocjenu općeg stanja vozila, a sve navedeno izvršeno je od strane ovlaštenih i stručnih lica BIHAMK ASISTENCIJA d.o.o. koja navedene usluge pruža Agenciji u skladu sa Ugovorom.

U mjesecu maju 2019. godine, Agencija je sačinila dopis kojim je obavijestila Općinski sud u Zavidovićima da je privremena mjera, određena na period od 6 mjeseci, istekla, te zatražili informaciju o tome da li je predmetna mjera produžena, odnosno da li je doneseno novo rješenje o produženju privremene mjere osiguranja predmetnog vozila.

Dana 20.11.2019. godine, na osnovu Rješenja Općinskog suda u Zavidovićima broj: 42 0 K 043209 19 Kpp 4 od 13. 11. 2019. godine, a zaprimljeno dana 19. 11.



2019. godine u Federalnu agenciju za upravljanje oduzetom imovinom, izvršena je primopredaja - povrat predmetnog vozila kao i prateće opreme i dokumentacije koja je zatečena u vozilu o čemu je sačinjen i Zapisnik o primopredaji – povratu oduzete imovine/putničko motorno vozilo broj: 03-11-476-22/2018 od 20. 11. 2019. godine.

U skladu s Rješenjem, navedeno putničko motorno vozilo, dodatna oprema koja se nalazila u vozilu i dokumentacija vozila predati su pripadniku MUP-a ZDK Zenica – Uprava policije, Sektor kriminalističke policije, Odsjek za opći kriminalitet, u stanju i sa oštećenjima na vozilu u kojem je vozilo i preuzeto.

Predmetno vozilo je od dana preuzimanja do dana predaje bilo smješteno u skladištu Agencije, a na vozilu su vršeni periodični kontrolni pregledi tečnosti, maziva kao i opšteg stanja vozila.

### **Rješenje Kantonalnog suda u Sarajevu broj 09 o K 031235 18 Kpp 121 od 13. 12. 2018. godine**

Predmetnim Rješenjem Kantonalnog suda u Sarajevu, Agenciji je povjereno na čuvanje i upravljanje putničko motorno vozilo marke **Renault tip Scenic**, VIN: VF1JAA50E28604914, reg.oznaka J05-O-047. Predmetno motorno vozilo je 14. 12. 2018. godine preuzeto, te nakon obavljenog tehničkog i vizuelnog pregleda od strane ovlaštenog servisa BIHAMK-a deponovano u skladište Agencije. U 2018. godini sudski vještak je procijenio vrijednost putničkog motornog vozila na iznos od 5.637,38 KM, te je izvršeno je i osiguranje vozila kod osiguravajućeg društva Triglav osiguranje d.d.

U izvještajnom periodu u ovom predmetu su poduzete aktivnosti usmjerene ka redovnom održavanju i provjeri ispravnosti motornog vozila. Te aktivnosti se odnose na sljedeće: provjeru tekućina u vozilu, provjeru nivoa motornog ulja, provjeru nivoa rashladne tečnosti, provjeru nivoa tečnost za vjetrobransko staklo, provjeru ispravnosti baterije za startanje vozila-akumulatora i ocjenu općeg stanja vozila, a sve navedeno izvršila su ovlaštena i stručna lica BIHAMK ASISTENCIJA d.o.o. koja navedene usluge pruža Agenciji u skladu sa Ugovorom.

### **Naredba Općinskog suda u Tuzli broj 32 0 K 344443 19 Kpp 5 od 12. 2. 2019. godine**

Predmetnom sudskom odlukom Općinskog suda u Tuzli, Agenciji je povjereno na čuvanje i upravljanje putničko motorno vozilo marke **Audi tip A6**, VIN: WAUZZZ4G5EN029624 2013. godište, reg. oznaka J52-T-707. Predmetno motorno vozilo je 14. 2. 2019. godine preuzeto, te nakon obavljenog tehničkog i vizualnog pregleda od strane ovlaštenog servisa BIHAMK-a deponovano u skladište Agencije. U martu 2019. godine, sudski vještak je procijenio vrijednost putničkog motornog vozila na iznos od 35.653,36 KM, te je izvršeno i osiguranje vozila kod osiguravajućeg društva Triglav osiguranje d.d.

### **Rješenje Općinskog suda u Bihaću, broj: 17 0 K 102415 19 Kpp 5 od 18. 11. 2019. godine**

Predmetnim sudskim rješenjem Općinskog suda u Bihaću, Agenciji je povjereno na čuvanje i upravljanje putničko motorno vozilo marke **PORSCHE**, tip 970,



panamera, bijele boje, broj šasije: WP0ZZZ97ZCL021893, registarskih oznaka K 26-A-544, 2012. godište, vlasništvo povezane osobe sa osumnjičenim, tj. njegovog pravnog sljedbenika. Uz vozilo dolazi i potvda o registraciji BROJ: AA 344 3406 i pripadajući ključevi od vozila. Mjera osiguranja na snazi je jednu godinu dana ili do naredne odluke suda. Službenici Agencije kontaktirali su Ministarstvo unutrašnjih poslova Unsko-sanskog kantona – Odjeljenje krim policije, gdje je navedeno vozilo privremeno smješteno do preuzimanja istog od strane Agencije. Preuzimanje je dogovoreno za naredni period.

U kontekstu upravljanja privremeno oduzetim motornim vozilima, važeće zakonske odredbe propisuju da se ista povjeravaju Agenciji samo na čuvanje. Međutim, samo čuvanje motornih vozila, bez njihove upotrebe, nije ekonomično i ista gube svoju svrhu i svoju vrijednost, što Agenciju izlaže dodatnim troškovima.

U tom kontekstu prijedlogom izmjena Zakona potrebno je propisati mogućnost njihove prodaje, kako bi se zaštitili kako interesi Federacije Bosne i Hercegovine u slučaju trajnog oduzimanja, tako i interesi vlasnika u slučaju povrata privremeno oduzetog vozila.

Naime, ukoliko sud odluči da se predmetno vozilo vraća vlasniku, vratit će mu se dobijeni iznos od prodaje, a ukoliko bude trajno oduzeto, dobijeni novac od prodaje uplaćuje se u Budžet Federacije Bosne i Hercegovine.

Odredbe o prodaji privremeno oduzete imovine postoje u mnogim državama članicama Evropske unije, a ista je predviđena i članom 10. Direktive 2014/42/EU Evropskog parlamenta i Vijeća Evropske unije o zamrzavanju i oduzimanju predmeta i imovinske koristi ostvarene krivičnim djelima u Evropskoj uniji.

### **Upravljanje nepokretnim stvarima**

Agencija je u izvještajnom periodu upravljala dvjema nekretninama koje je nastavila izdavati zatečenim zakupcima. Sve zakupnine se na mjesečnom nivou uplaćuju na račun za posebne namjene Agencije, te iste, kao što je prethodno već konstatovano, ostaju deponovane na predmetnom računu do pravosnažne presude u pripadajućim krivičnim postupcima. I na ovaj način se postiže svrha kako privremene mjere tako i Zakona jer optužena lica, koja se terete da su nezakonito stekla predmetne nekretnine, ne mogu iz takvih "nezakonitih" nekretnina ubirati plodove istih, odnosno novčana sredstva u vidu zakupnina.

Osnovni zadatak Agencije prilikom privremenog upravljanja nekretninama jeste očuvanje njihove vrijednosti, što podrazumijeva i sprečavanje nastanka eventualnih šteta. Kako bi na najbolji mogući način sačuvala vrijednost nekretnina koje su joj povjerene na čuvanje, Agencija je potpisala ugovor sa specijaliziranim institucijama koje se profesionalno bave poslovima održavanja i osiguranja objekata, tako da su oštećenja ili umanjenja vrijednosti nekretnina svedena na minimum.

Agencija je u izvještajnom periodu postupala po sljedećim rješenjima:

**Rješenjem Kantonalnog suda u Sarajevu, broj 09 0 K 026508 17 Kpp 182 od 24. 4. 2017. godine**, prema optuženim licima određene su privremene mjere osiguranja imovinske koristi pribavljene krivičnim djelom i to zabrana otuđenja i



opterećenja nekretnine i stvarnih prava upisanih na nekretnini koja se vodi u zemljišnim knjigama Općinskog suda u Sarajevu. Ista nekretnina je navednim rješenjem oduzeta i povjerena na čuvanje i upravljanje Agenciji.

Nekretninu na osnovu Ugovora o zakupu koristi pravno lice, a nadležni sud je odredio da u ugovorni odnos s Agencijom kao privremenim upraviteljem predmetne nekretnine, stupi zakupac koji je s prethodnim vlasnikom, kao i osumnjičenim imao sklopljen Ugovor o zakupu. Po osnovu ugovora o zakupu, ugovorna strana, na račun za posebne namjene mjesečno uplaćuje iznos od 2.955,83 KM po osnovu zakupa nekretnine. Također, zakupac izmiruje redovne troškove komunalnih usluga, o čemu pismeno obavještava Agenciju.

Krajem maja 2018. godine sud je produžio mjeru osiguranja u ovom predmetu do 24. 4. 2020. godine, te je s zakupcem zaključen aneks ugovora o zakupu kojim je isti produžen na period određen sudskim rješenjem.

Kao što je već rečeno, zakupac uredno uplaćuje zakupnine i ostale režijske troškove, te o svemu obavještava Agenciju. Također, uposlenici Agencije vrše redovnu kontrolu i obilazak predmetne nekretnine. S obzirom na to da je sudski predmet u sklopu kojeg je nekretnina privremeno oduzeta još uvijek u toku, Agencija nastavlja izdavati predmetni objekt postojećem zakupcu, te se zakupnine čuvaju na računu za posebne namjene Agencije s kojeg će iste, ovisno o ishodu sudskog postupka, ili biti uplaćene u Budžet Federacije Bosne i Hercegovine ili vraćene vlasniku prostora.

**Rješenjem Kantonalnog suda u Sarajevu, broj 09 0 K 021547 17 Kv 34 od 14. 7. 2017. godine**, prema optuženim licima određena je privremena mjera osiguranja imovinske koristi stečene krivičnim djelom i to u obliku oduzimanja nekretnine od optužene osobe i povjeravanja iste na upravljanje Agenciji. Riječ je o luksuznom stambenom objektu u Sarajevu, koji je u trenutku oduzimanja bio pod zakupom.

S obzirom na navedeno, Agencija je s istim zakupcem zaključila ugovor o zakupu nekretnine. Po osnovu ugovora o zakupu, zakupac uplaćuje na račun za posebne namjene mjesečni iznos od 11.000,00 KM. Također, zakupac izmiruje redovno troškove komunalnih usluga o čemu pismeno obavještava Agenciju. Potpisana je i polica osiguranja od materijalne štete čime je nekretnina dodatno osigurana. U proteklom periodu na navedenoj nekretnini, u smislu održavanja, Agencija je intervenisala dva puta i to prilikom otklanjanja kvara na rashladnom sistemu objekta i prilikom kvara na kanalizacionoj cijevi i sistemu centralnog grijanja.

U ovom izvještajnom periodu su, u skladu s ugovorom o zakupu, bili izvršeni određeni radovi na održavanju nekretnine te popravke sitnih kvarova. Također, izvršeno je farbanje i lakiranje ograde, te uređenje dvorišta, a sve kako bi se objekt pripremio za zimu, te kako vrijednost istog ne bi opala. Sve navedeno je pismeno konstatovano, te je sačinjena i fotodokumentacija. Navedeno postupanje Agencije je u skladu s načelom upravljanja pažnjom dobrog domaćina te očuvanja vrijednosti povjerene joj imovine.

Kako Agenciji nije odobren dostatan budžet za 2020. godinu, a kako su troškovi održavanja nekretnina kojima Agencija upravlja iz godine u godinu sve veći, u narednom periodu Agencija će uputiti zahtjev za izmjene i dopune Budžeta. U slučaju da zahtjevu Agencije za izmjenama i dopunama Budžeta ne bude udovoljeno, bit



ćemo prinuđeni troškove održavanja nekretnina namirivati iz sredstava koja je Agencija primila od zakupnina i koja se čuvaju na računu za posebne namjene.

### **Privremeno oduzeti novac**

Sud u toku trajanja krivičnog postupka, u skladu s Zakonom, može radi osiguranja imovinske koristi za koju se sumnja da je stečena izvršenjem krivičnog djela izreći i privremenu mjeru koja se ogleda u oduzimanju gotovog novca i njegove predaje Agenciji.

Gotov novac koji je privremeno preuzet Agencija uplaćuje na račun za posebne namjene, te isti novac, dok se ne donese pravosnažna presuda, mora ostati deponovan na predmetnom računu. Naime, oduzimanjem gotovog novca, povjeravanjem istog Agenciji na upravljanje, te u konačnici deponovanjem istog na račun za posebne namjene, postiže se svrha kako mjere tako i samog Zakona. Na taj način eventualno potraživanje Federacije Bosne i Hercegovine prema, u budućnosti, osuđenom licu, efikasno je osigurano, te po izricanju pravosnažne presude, tako oduzeti novac bit će uplaćeni u Budžet Federacije Bosne i Hercegovine.

Svrha mjere, u opisanom slučaju, jeste da optuženo lice ne može raspolagati predmetnim novcem, odnosno ne može izbjeći eventualnu finansijsku obavezu prema Federaciji Bosne i Hercegovine.

Agencija je u izvještajnom periodu postupala po opisanim sudskim odlukama:

**Rješenjem Kantonalnog suda u Sarajevu, br. 09 0 K 021547 Kv 35 od 21. 7. 2017. godine**, prema optuženim licima određena je privremena mjera osiguranja imovinske koristi stečene krivičnim djelom i to u obliku oduzimanja gotovog novca u iznosu 105.500,00 EUR-a od optužene osobe i povjeravanja predmetnog novca Agenciji na upravljanje. Agencija je po preuzimanju gotovog novca isti uplatila na račun za posebne namjene.

S obzirom na to da je riječ o privremenoj mjeri, odnosno krivični postupak u ovom predmetu još nije pravosnažno okončan, predmetni novac se u ovom izvještajnom periodu i dalje nalazi deponovan na računu za posebne namjene Agencije.

**Rješenjem Kantonalnog suda u Bihaću, br. 01 0 K 013572 18 Kpp od 11. 4. 2018. godine**, prema osumnjičenim licima određena je mjera osiguranja nezakonito stečene imovine krivičnim djelom i to oduzimanje gotovog novca u iznosu 3.310,00 EUR-a i 4.800,00 KM, te povjeravanje istog na čuvanje i upravljanje Agenciji.

Dana 26. 4. 2018. godine službenici Agencije su preuzeli predmetni novac, te isti odmah uplatili u poslovnici Union banke kod koje Agencija ima otvoren račun za posebne namjene. Novac će na predmetnom računu ostati do konačne odluke suda u ovom predmetu. O svim radnjama su sačinjeni odgovarajući zapisnici. S obzirom na to da je u ovom predmetu riječ o privremenim mjerama, isti je još uvijek u toku te će, ovisno o tome kad i kakvu sud donese pravosnažnu presudu, gotov novac postati ili vlasništvo Federacije Bosne i Hercegovine ili će se vratiti vlasniku.



## **Privremeno oduzeti predmeti povjereni na čuvanje**

**Naredba Kantonalnog suda u Sarajevu br. 09 0 K 031067 19 Kpp 9 od 20. 12. 2019. godine**

Predmetnom Naredbom Kantonalnog suda u Sarajevu privremeno oduzeti predmeti koji se nalaze u Kantonalnom tužilaštvu Kantona Sarajevo povjereni su na čuvanje Federalnoj agenciji za upravljanje oduzetom imovinom do uvođenja u dokazni postupak ili druge odluke suda. S obzirom na navedeno, Agencija je 23. 12. 2019. godine, zapisnički, preuzela predmete od predstavnika Kantonalnog tužilaštva Kantona Sarajevo i iste, u skladu s Odlukom Centralne banke BiH o ustupanju zatvorene ostave, deponovala u prostorije Centralne banke BiH u zatvorenu ostavu o čemu je sačinjen i Zapisnik i Potvrda o obavljenoj predaji u ostavu broj 118-07-2-59-2/19 na osnovu koje se predmeti mogu ponovo preuzeti od Agencije. Preuzeti predmeti (novac i nakit) zapakovani su u deset zasebnih vrećica sa specifikacijom sadržaja u istim (izuzev nakita). Kao takvi bez otvaranja su pohranjeni u posebnu vreću za novac koju koristi Centralna banka BiH prilikom deponovanja predmeta i novca u zatvorenu ostavu, te je u skladu sa svim navedenim procedurama izvršeno deponovanje. O poduzetim radnjama pismeno je obaviješten Kantonalni sud u Sarajevu koji je donio Naredbu.

Kao jedan od problema koji se pojavljuje prilikom upravljanja privremeno, a u pojedinim slučajevima, i trajno oduzetom imovinom je i problem skladištenja ove vrste imovine. Naime, zbog specifičnosti poslova koji se obavljaju u Agenciji, a koji zahtjevaju cjelodnevnu mogućnost pristupa skladišnim kapacitetima, kao i osiguranje istih, Agenciji je potreban prostor koji će omogućiti 24-satno obezbjeđenje.

Kada su u pitanju skladišni kapaciteti Agencije, a zbog postupanja po većem broju sudskih odluka kojima se od osumnjičenih, optuženih ili osuđenih lica oduzima privremeno ili trajno nezakonito stečena imovinska korist, između ostalog, i motorna vozila i druge pokretne stvari, dio skladišta sa kojim Agencija trenutno raspolaže u okviru kompleksa skladišta „Rakovica“ postalo je nedostatno u smislu smještajnih kapaciteta, tako da je Agencija prisiljena da se obraća različitim institucijama za smještaj privremeno i trajno oduzete imovine.


U kontekstu upravljanja, to predstavlja veliki problem jer se imovina nalazi na različitim lokacijama, te samim tim je onemogućeno kontinuirano nadgledanje, što dodatno otežava provođenje poslova oko upravljanja.

Kad su u pitanju privremeno oduzeta novčana sredstva, kao i dragocjenosti, Agencija taj problem privremeno rješava polaganjem istih u različite komercijalne banke ili Centralnu banku BiH.

S ciljem obezbjeđenja uvjeta za zaštitu i očuvanje vrijednosti oduzete imovine na najbolji mogući način, Agenciji je također potreban sef, koji bi imao 24-satni nadzor i fizičku zaštitu, te koji bi ujedno bio na raspolaganju službenicima Agencije u svakom trenutku, a s ciljem efikasnog upravljanja istim.



Radi preventivnog djelovanja u slučaju proširenja nadležnosti Agencije na područje upravljanja oduzetim predmetima krivičnog djela, Agenciji će biti potreban mnogo veći prostor kojem bi uposlenici imali mogućnost pristupa 24/7.



**Grafikon 3:** Vrsta privremeno oduzete imovinske koristi u izvještajnom periodu


### Vrijednost imovine

Prilikom preuzimanja privremeno oduzete imovine sačinjava se zapisnik u koji se, između ostalog, unose podaci o imovini i stanju u kojem je preuzeta, kao i podaci o vrijednosti koja se oduzima. Na osnovu tih podataka utvrđeno je da vrijednost navedene imovine kojom je Agencija upravljala u izvještajnom periodu iznosi **13.976.084,67 KM**.

Vrijednost imovine kojom je Agencija upravljala u izvještajnom periodu je:

- Vrijednost poslovnih udjela iznosi 6.171.863,08 KM;
- Vrijednost nekretnina iznosi 6.500.000,00 KM;
- Vrijednost motornih vozila iznosi 144.489,23 KM;
- Novac u iznosu od 108.810,00 EUR-a i 946.918,50 KM (ukupno u domaćoj valuti 1.159.732,36 KM).





**Grafikon 4:** Vrijednost privremeno oduzete imovinske koristi kojom je Agencija upravljala u izvještajnom periodu

Novac kojim Agencija privremeno upravlja nalazi se u banci na **računu posebnih namjena** Agencije i trenutno se na računu nalazi novčani iznos od **1.159.732,36 KM**, uključujući i do sada uplaćene zakupnine iz zakupodavnih odnosa **413.586,56 KM**.

#### **4.2. OPERATIVNI CILJ 2 – UČINKOVITO POSTUPANJE TRAJNO ODUZETOM IMOVINOM**

Trajno oduzimanje imovine pribavljene krivičnim djelom sud određuje donošenjem presude u redovnom ili posebnom postupku. Tim aktima određuje se vlasništvo Federacije Bosne i Hercegovine nad oduzetom imovinom, sastav oduzete imovine, njena novčana protuvrijednost, rok za dobrovoljno izvršenje presude, te nalog za upis prava vlasništva u korist Federacije Bosne i Hercegovine u javnim knjigama ili registrima.


Nakon što se sudska presuda o trajnom oduzimanju imovine izvrši bilo dobrovoljno ili putem prisilnog izvršenja, staranje o imovini preuzima Agencija, kojoj stoje na raspolaganju različite opcije postupanja u ovoj fazi postupka za oduzimanje imovinske koristi.

Nakon što izvrši procjenu imovine, Agencija je dužna provesti postupak prodaje imovine metodom javnog nadmetanja, a sredstva ostvarena prodajom uplaćuju se u Budžet Federacije Bosne i Hercegovine. U slučaju da prvo javno nadmetanje ne uspije, Zakon je predvidio zakazivanje drugog kruga javne prodaje, gdje je oduzetu imovinu moguće prodati i po nižoj cijeni, ali koja ne može biti niža od 50 % od vrijednosti procijenjene imovine.

U slučaju da se u roku od jedne godine dana oduzeta imovina ne proda, nakon drugog kruga javnog nadmetanja, Zakon je ovlastio Agenciju da, shodno procjeni, predloži Vladi Federacije Bosne i Hercegovine dalje postupanje oduzetom imovinom. Na taj način, imovinu je moguće pokloniti institucijama koje se primarno finansiraju iz



Budžeta Federacije Bosne i Hercegovine, pokloniti u humanitarne svrhe, iznajmiti, ustupiti na čuvanje i korištenje ili uništiti.



**Grafikon 5:** Vrsta trajno oduzete imovinske koristi u izvještajnom periodu

### **Presude proslijeđene na postupanje Federalnom pravobranilaštvu**

Agencija je u dosadašnjem radu zaprimila određeni broj presuda po kojima je za postupanje nadležno Federalno pravobranilaštvo. Naime, u tim predmetima, sudovi su pravosnažnim presudama utvrdili postojanje nezakonito stečene imovinske koristi koja nije određena u svom krajnjem obliku npr. kao nekretnina, novac, motorno vozilo i sl., te se kao takva ne može fizički oduzeti. Dakle, riječ je o novčanoj obavezi koju je osuđeno lice dužno izvršiti prema Federaciji Bosne i Hercegovine, odnosno Budžetu Federacije Bosne i Hercegovine.

U tim slučajevima, sud presudom ostavlja rok osuđenom licu da dobrovoljno izvrši svoju novčanu obavezu, odnosno uplati iznos utvrđen presudom u Budžet Federacije Bosne i Hercegovine, te ako u tom periodu isti ne ispuni predmetnu obavezu, Federalno pravobranilaštvo je dužno i jedino ovlašteno podnijeti prijedlog za izvršenje na imovini osuđenog lica, kako bi se utvrđeno potraživanje Federacije Bosne i Hercegovine iz predmetne imovine namirilo.

U ovom slučaju treba voditi računa da je Zakon o oduzimanju nezakonito stečene imovine krivičnim djelom u Federaciji Bosne i Hercegovine izričito propisao da se ovakvo namirenje potraživanja Federacije Bosne i Hercegovine provodi isključivo na prijedlog Federalnog pravobranilaštva, te na osnovu Zakona o izvršnom postupku Federacije Bosne i Hercegovine. S obzirom na navedeno, nesporno proizilazi da je Zakon o izvršnom postupku Federacije Bosne i Hercegovine, u naplati ovakvog potraživanja "lex specialis", te se isti mora dosljedno poštovati i primjenjivati.

U praksi navedeno podrazumijeva dugotrajan postupak pred izvršnim odjeljenjem nadležnog suda, te protek značajnog perioda prije nego se potraživanje naplati. U praksi se može desiti i da se potraživanje uopće ne naplati jer osuđeno lice, u



hipotetskom, ali i realnom slučaju, ne posjeduje nikakvu imovinu iz koje bi se Federacija Bosne i Hercegovine naplatila. Ukoliko pretpostavimo da osuđeni raspolaže imovinom, postupak se može, zbog ulaganja dozvoljenih i propisanih pravnih lijekova odugovlačiti, ili upućivati na parnicu, također može doći i do otvaranja stečaja nad imovinom pravnog lica u kojem slučaju izvršni postupak zastaje, a Federalno pravobranilaštvo u ime Federacije Bosne i Hercegovine, prijavljuje svoje potraživanje u sad već novom postupku.

**Presuda Općinskog suda u Bihaću broj 17 0 K 000203 08 K od 26. 3. 2014. godine**

Predmetnom presudom Općinskog suda u Bihaću utvrđeno je da se od osuđenog lica ima oduzeti nezakonito stečena imovinska korist u iznosu 876.543,36 KM. Od Federalnog pravobranilaštva Agencija je zaprimila informaciju 16. 1. 2019. godine, u kojoj se navodi da je Pravobranilaštvo pokrenulo izvršni postupak po osnovu pravosnažne presude, međutim da je Općinski sud u Bihaću donio Rješenje o prekidu postupka, iz razloga što je nad firmom Šipad Bina dd pokrenut stečajni postupak.

Shodno tome, Pravobranilaštvo je nadležnom sudu podnijelo prijavu potraživanja radi namirenja iz stečajne mase. Međutim, Općinski sud u Bihaću je donio Rješenje kojim se prijava potraživanja povjerioca odbacuje. Na navedeno Rješenje, Pravobranilaštvo je uložilo žalbu, te je Kantonalni sud u Bihaću uvažio žalbu i predmet vratio na ponovni postupak.

**Presuda Kantonalnog suda u Novom Travniku broj 06 0 K 007444 15 K od 11. 6. 2015. godine**

Predmetnom presudom Kantonalnog suda u Novom Travniku utvrđeno je da se od osuđenih lica ima oduzeti nezakonito stečena imovinska korist u iznosu 990,00 KM. S obzirom na to da se radi o presudi prema kojoj Federalno pravobranilaštvo treba pokrenuti prijedlog za izvršenje, Agencija je istu i prosljedila Pravobranilaštvu na nadležno postupanje.

U mjesecu januaru 2019. godine, Agencija je zaprimila obavijest od Federalnog pravobranilaštva o statusu ovog predmeta, odnosno da je Pravobranilaštvo pokrenulo izvršni postupak podnošenjem prijedloga za izvršenje Općinskom sudu u Travniku.

Dana 24. 12. 2019. godine zaprimljen je akt Federalnog pravobranilaštva broj: I-275/17 od 23. 12. 2019. godine kojim se dostavlja Rješenje Općinskog suda u Travniku broj: 51 0 I 143748 18 I od 10. 12. 2019. godine u kojem je naznačeno da se obustavlja postupak izvršenja određen Rješenjem, istog suda, broj: 51 0 I 143748 18 I od 4. 2. 2019. godine.

**Presuda Općinskog suda u Tešnju broj 39 0 K 044573 16 K od 9. 2. 2017. godine**

Predmetnom presudom Općinskog suda u Tešnju utvrđeno je da se od osuđenog lica ima oduzeti nezakonito stečena imovinska korist u iznosu 19.886,00 KM. S



obzirom to da se radi o presudi prema kojoj Federalno pravobranilaštvo treba pokrenuti izvršni postupak, Agencija je istu i prosljedila Pravobranilaštvu na nadležno postupanje.

U mjesecu januaru 2019. godine, Agencija je zaprimila obavijest Federalnog pravobranilaštva o statusu ovog predmeta, odnosno da je Pravobranilaštvo pokrenulo izvršni postupak na osnovu kojeg je Općinski sud u Tešnju donio Rješenje o izvršenju na iznos potraživanja u skladu s navedenom presudom, a na koje je izvršenik uložio prigovor po kojem sud još nije donio odluku.

**Presuda Općinskog suda u Tešnju broj 39 0 K 036138 14 K od 23. 10. 2015. godine**

Predmetnom presudom Općinskog suda u Tešnju utvrđeno je da se od osuđenog fizičkog lica ima oduzeti nezakonito stečena imovinska korist u iznosu 32.301,74 KM. S obzirom na to da se radi o presudi prema kojoj Federalno pravobranilaštvo treba pokrenuti izvršni postupak, Agencija je sačinila dopis i zajedno sa navedenom presudom isti prosljedila Pravobranilaštvu na nadležno postupanje.

U mjesecu januaru 2019. godine, Agencija je zaprimila obavijest Federalnog pravobranilaštva o statusu ovog predmeta, odnosno da je Pravobranilaštvo pokrenulo izvršni postupak. Na osnovu ovog postupka Općinski sud u Tešanj donio Rješenje o izvršenju, a na koje je izvršenik uložio prigovor po kojem sud još nije donio odluku.

**Presuda Općinskog sud u Tuzli broj 32 0 K 319527 18 K od 5. 2. 2018. godine**

Predmetnom presudom Općinskog suda u Tešnju utvrđeno je da se od osuđenog lica ima oduzeti nezakonito stečena imovinska korist u iznosu 409,00 KM. S obzirom na to da se radi o presudi prema kojoj Federalno pravobranilaštvo treba pokrenuti izvršni postupak, Agencija je sačinila dopis i s navedenom presudom isti prosljedila Pravobranilaštvu na nadležno postupanje.

U izvještajnom periodu Agencija nije dobila obavijest od Federalnog pravobranilaštva o statusu ovog predmeta.

**Presuda Općinskog suda u Tešnju broj 39 0 K 047956 17 K od 16. 1. 2018. godine**

Predmetnom presudom Općinskog suda u Tešnju utvrđeno je da se od osuđenog lica ima oduzeti nezakonito stečena imovinska korist u iznosu 130,00 KM. S obzirom na to da se radi o presudi prema kojoj Federalno pravobranilaštvo treba pokrenuti izvršni postupak, Agencija je istu i prosljedila Pravobranilaštvu na nadležno postupanje.

U izvještajnom periodu Agencija je zaprimila obavijest Federalnog pravobranilaštva o statusu ovog predmeta, odnosno postupajući po prijedlogu Federalnog pravobranilaštva, Općinski sud u Tešnju dozvolio je predloženo izvršenje 7. 2. 2019. godine nad imovinom osuđenog.



**Presuda Kantonalnog suda u Sarajevu broj 09 0 K 031736 18 K od 29. 8. 2018. godine**

Predmetnom presudom Kantonalnog suda u Sarajevu utvrđeno je da se od osuđenog fizičkog lica ima oduzeti nezakonito stečena imovinska korist u iznosu 74.000,00 KM, odnosno da je osuđeni dužan u roku od pet godina od dana pravosnažnosti presude predmetni iznos uplatiti u Budžet Federacije Bosne i Hercegovine. S obzirom na to da se radi o presudi prema kojoj Federalno pravobranilaštvo treba pokrenuti izvršni postupak, Agencija je sačinila dopis koji je proslijeđen Pravobranilaštvu na nadležno postupanje.

U izvještajnom periodu Agencija nije dobila obavijest od Federalnog pravobranilaštva o statusu ovog predmeta.

**Presuda Kantonalnog suda u Novom Travniku broj 06 0 K 006818 15 K od 09.02.2016. godine**

Predmetnom presudom Kantonalnog suda u Novom Travniku utvrđeno je da se od osuđenog fizičkog lica ima oduzeti nezakonito stečena imovinska korist u iznosu 136.380,17 KM. S obzirom na to da se radi o presudi prema kojoj Federalno pravobranilaštvo treba pokrenuti izvršni postupak, Agencija je sačinila dopis koji je proslijeđen Pravobranilaštvu na nadležno postupanje. Dana 27. 5. 2019. godine Federalno pravobranilaštvo je vratilo dostavljenu presudu Agenciji sa obrazloženjem da isto nije nadležno da postupa po zaprimljenoj presudi iz razloga, kako su naveli, što nije oštećen Budžet Federacije Bosne i Hercegovine niti je Federalno pravobranilaštvo zastupnik oštećenog pravnog lica. Nakon zaprimljenog odgovora Federalnog pravobranilaštva, Agencija je sačinila dopis koji je uputila Kantonalnom sudu u Novom Travniku u kojem se Sud obavještava da se Federalno pravobranilaštvo oglasilo nenadležnim za postupanje u ovom predmetu.

**Presuda Kantonalnog suda u Novom Travniku broj 06 0 K 010507 18 K od 1. 10. 2018. godine**

Predmetnom presudom Kantonalnog suda u Novom Travniku utvrđeno je da se od osuđenih lica ima oduzeti nezakonito stečena imovinska korist u iznosu 700,00 KM. S obzirom na to da se radi o presudi prema kojoj Federalno pravobranilaštvo treba pokrenuti izvršni postupak, Agencija je sačinila dopis koji je proslijeđen Pravobranilaštvu na nadležno postupanje.

Federalno pravobranilaštvo je službenim putem, aktom broj R-176/19-XI od 13. 6. 2019. godine vratilo dostavljenu presudu Agenciji s obrazloženjem da se Agencija obrati nadležnom sudu u skladu sa Zakonom o krivičnom postupku jer postupak prinudne naplate troškova krivičnog postupka, sudskog paušala i oduzimanja nezakonito stečene imovinske koristi vrši po službenoj dužnosti nadležni sud.

Nakon zaprimanja gore navedenog akta Federalnog pravobranilaštva, Agencija je sačinila obavijest Kantonalnom sudu u Novom Travniku, a u prilogu je dostavljena fotokopija odgovora Federalnog pravobranilaštva.

**Presuda Općinski sud Tuzla broj 32 0 K 186435 16 K 2 od 2. 9. 2016. godine**



Predmetnom presudom Općinskog suda u Tuzli utvrđeno je da se od osuđenog lica ima oduzeti nezakonito stečena imovinska korist u iznosu 39.920,96 KM. S obzirom na to da se radi o presudi prema kojoj Federalno pravobranilaštvo treba pokrenuti izvršni postupak, Agencija je sačinila dopis koji je proslijeđen Pravobranilaštvu na nadležno postupanje.

Federalno pravobranilaštvo je službenim putem, aktom broj R-197/19 od 28. 5. 2019. godine, vratilo dostavljenu presudu Agenciji s obrazloženjem da se Agencija obrati nadležnom sudu u skladu sa Zakonom o krivičnom postupku iz razloga jer postupak prinudne naplate troškova krivičnog postupka, sudskog paušala i oduzimanja nezakonito stečene imovinske koristi vrši po službenoj dužnosti nadležni sud.

Nakon zaprimanja gore navedenog akta Federalnog pravobranilaštva, Agencija je sačinila dopis koji je poslan Općinskom sudu u Tuzli, a u prilogu obavijesti dostavljena je fotokopija odgovora Federalnog pravobranilaštva.

#### **Presuda Općinskog suda u Gračanici broj 27 0 K 040830 18 K od 6. 5. 2019. godine**

Dana 14. 6. 2019. godine, Agencija je od Federalnog pravobranilaštva zaprimila dopis broj: R181/19-XI kojim se upoznaje o Presudi Općinskog suda u Gračanici broj: 27 0 K 040830 18 K od 6. 5. 2019. godine. Predmetnom Presudom koja se nalazi u prilogu gore navedenog dopisa utvrđeno je da se od osuđenih fizičkih lica ima oduzeti nezakonito stečena imovinska korist u ukupnom iznosu od 94.080,00 KM, odnosno da jedno osuđeno lice u roku od osam mjeseci od dana pravosnažnosti presude uplati 20.100,00 KM u Budžet Federacije Bosne i Hercegovine, a drugo osuđeno lice u roku od dvije godine od dana pravosnažnosti presude uplati 73.980,00 KM u Budžet Federacije Bosne i Hercegovine.

#### **Novčana sredstva uplaćena u Budžet Federacije Bosne i Hercegovine**

#### **Presuda Općinski sud u Tešnju broj 39 0 K 036717 18 K od 30. 10. 2018. godine**

U skladu s presudom 5. 7. 2019. godine kontaktirana je sutkinja Općinskog suda u Tešnju vezano za preuzimanje 20.000.00 KM po predmetnoj presudi, koja je izjavila da je firma Mepromex d.o.o. novac greškom uplatila na Budžet Zeničko-dobojskog kantona i da Agencija dostavi podatke o računu za posebne namjene Agencije koji je otvoren kod Union Banke d.d. Sarajevo da bi predmetni novac nakon storniranja pogrešne uplate i prebacivanja na bankovni račun Općinskog suda u Tešnju mogao biti uplaćen Agenciji. Dana 5. 7. 2019. godine, Općinskom sudu u Tešnju dostavljeni su podaci o računu za posebne namjene Agencije na koji je 25. 7. 2019. godine izvršena uplata navedenog iznosa koji je 26. 7. 2019. godine Agencija uplatila u Budžet Federacije Bosne i Hercegovine. Nakon izvršene uplate sredstava u Budžet, Agencija je pismenim putem obavijestila nadležni sud.



**Presuda Općinskog suda u Cazinu broj 20 0 K 061769 19 K od 26. 8. 2019. godine**

U skladu s presudom dana 11. 10. 2019. godine izvršeno je preuzimanje trajno oduzetih novčanih sredstava u iznosu od 1,450.00 € i 220 KM u ukupnom iznosu protuvrijednosti od 3.054.75 KM koja su istog dana uplaćena na račun za posebne namjene Agencije. O svemu je sačinjen Zapisnik o primopredaji oduzete imovine/gotov novac broj: 03-11-256-1/2019 od 11. 10. 2019. godine. Novac je, u daljoj proceduri Agencija uplatila u Budžet Federacije Bosne i Hercegovine. O svemu je pismeno obaviješten Općinski sud u Cazinu nakon čega je predmet arhiviran.

**Presuda Općinski sud u Kiseljaku broj 49 0 K 027871 15 K od 21. 5. 2015. godine**

U skladu s presudom kontaktiran je postupajući sudija. Na osnovu instrukcija sudije, prema sudu u Kiseljaku, poslana je Informacija Agencije o broju računa za posebne namjene broj: 03-11-266-1/2019 od 15. 10. 2019. godine na koji se trebaju uplatiti trajno oduzeta novčana sredstva u iznosu od 182,90 KM. Dana 29. 10. 2019. godine sud je izvršio uplatu na račun za posebne namjene Agencije otvoren u Union bank d.d. Sarajevo. Novac je, prema proceduri, Agencija uplatila u Budžet Federacije Bosne i Hercegovine. O svemu je pismeno obaviješten Općinski sud u Kiseljaku nakon čega je predmet arhiviran.

**Ostale pravosnažne presude**

U dosadašnjem radu Agencija je zaprimila četiri pravosnažne sudske presude kojima je određeno oduzimanje nezakonito stečene imovine, međutim, iz objektivnih razloga, ukupna novčana protuvrijednost te imovine nije uplaćena u Budžet Federacije Bosne i Hercegovine. Predmetne presude, kao i razlozi navedenog predstavljeni su kako slijedi:

**Presuda Kantonalnog suda u Tuzli broj 03 0 K 011879 14 K od 19. 12. 2014. godine**

Predmetnom presudom Kantonalnog suda u Tuzli utvrđeno je da se od osuđenih lica oduzima nezakonito stečena imovina i to pokretne stvari različite vrste, te građevinski materijal. U 2017. godini predmetne pokretne stvari i građevinski materijal su preuzeti i deponovani u skladište Agencije. U skladu sa zakonom utvrđenom procedurom, službenici Sektora izvršili su procjenu istih, te je Agencija raspisala javnu prodaju predmetnih stvari. S obzirom na to da nije bilo zainteresovanih kupaca, dio stvari, odnosno građevinski materijal, u skladu sa zakonskom procedurom poklonjen je Savezu ratnih vojnih invalida Tuzlanskog kantona. Za preostale stvari u 2018. godini raspisana je druga prodaja, te su pojedine stvari i prodate u ovom postupku.

Dio stvari iz predmetne presude koje nisu prodate, a nalazile su se u skladištu Agencije u Rakovici, poklonjene su u 2019. godini, dok se preostale stvari, koje nisu ni poklonjene ni prodate, i dalje nalaze u skladištu.



**Presuda Općinskog suda u Kaknju broj 36 0 K 035746 17 Kps od 25. 9. 2017. godine**

Predmetnom presudom Općinskog suda u Kaknju utvrđeno je da se od osuđenih lica trajno oduzimaju pokretne stvari različite vrste. Službenici Agencije preuzeli su predmetne stvari, te ih deponovali u skladište u Rakovici. U skladu sa zakonom utvrđenom procedurom, Agencija je procijenila iste, te raspisala javnu prodaju, međutim za iste nije bilo zainteresovanih kupaca.

Na osnovu Zakona o oduzimanju nezakonito stečene imovine krivičnim djelom, direktor Agencije je donio odluku o prodaji pokretnih stvari umanjeno za 30% od procjene vrijednosti istih, a druga prodaja-javno nadmetanje objavljena je 26. 7. 2019. godine u tri javna glasila. S obzirom na to da nije pristigla niti jedna ponuda po drugom javnom nadmetanju, prodaja je proglašena nevažećom.

Dio stvari iz predmetne presude, poklonjene su u 2019. godini, dok se preostale stvari koje nisu poklonjene i dalje nalaze u skladištu.

**Presuda Općinskog suda u Cazinu broj 20 0 K 061909 19 K od 26. 9. 2019. godine**

Predmetnom presudom Općinskog suda u Cazinu utvrđeno je da se od osuđenog lica trajno oduzima pokretna stvar, motorna pila marke Stihl 026. Od Općinskog suda u Cazinu je dobijena informacija i potvrda o privremenom oduzimanju predmeta broj: 05-1/03-3-677/06 od 13. 9. 2006. godine da se navedeni predmet nalazi u prostorijama Ministarstva unutrašnjih poslova Unsko-sanskog kantona. Sa ovlaštenom osobom su dogovoreni detalji oko preuzimanja predmeta.

**Upravljanje dionicama**

**Presuda Kantonalnog suda u Sarajevu broj 09 0 K 021547 16 K 2 od 12. 12. 2016. godine**

Predmetnom presudom Kantonalnog suda u Sarajevu utvrđeno je da se od osuđenog lica trajno oduzimaju dionice koje su postale vlasništvo Federacije Bosne i Hercegovine. U Registru vrijednosnih papira Federacije Bosne i Hercegovine izvršena je promjena upisa titulara prava vlasništva nad predmetnim dionicama s osuđenog lica na Federaciju Bosne i Hercegovine, a nakon toga s Federacije Bosne i Hercegovine na Agenciju, a sve s ciljem prodaje predmetnih dionica, te nakon eventualne prodaje, uplate dobivenog novčanog iznosa u Budžet Federacije Bosne i Hercegovine. Agencija trenutačno ima s bankom/brokerom zaključen Ugovor o obavljanju brokerskih poslova kako bi se na burzi predmetne dionice, preko banke/brokera, mogle prodati.

Službenici Agencije su informisali banku s kojom je zaključen Ugovor o obavljanju brokerskih poslova da je došlo do promjene jednog od lica ovlaštenih za izdavanje naloga i shodno tome dostavljeni su podaci za novo lice ovlašteno za izdavanje naloga.



U izvještajnom periodu službenici Agencije nisu poduzimali aktivnosti u okviru ovog predmeta. Naime, na osnovu informacija dobivenih od banke/brokera riječ je o dionicama koje nisu atraktivne, te se s istima ne trguje. Pored navedenog riječ je o malom broju dionica niske nominalne vrijednost. Vrijednost zaključenog ugovora s bankom/brokerom se ogleda u činjenici da će ista, ukoliko se u budućnosti trajno oduzmu utržive dionice, raditi na prodaji istih kako bi se dobivena novčana sredstva mogla uplatiti u Budžet Federacije BiH.

### **Upravljanje gotovim novcem u stranoj valuti**

**Presuda Općinskog suda u Zenici br. 43 0 K 135584 16 K 7 od 22. 12. 2016. godine**

Predmetnom presudom Općinskog suda u Zenici utvrđeno je da se od osuđenog lica ima oduzeti nezakonito stečena imovinska korist u obliku gotovog novca u stranoj valuti – ukrajinske grivnje.

U 2017. godini je predmetni novac preuzet. Poduzete su aktivnosti na pokušaju konverzije istog u domaću valutu, međutim nijedna finansijska institucija u Bosni i Hercegovini ne vrši konverziju predmetne valute. Naime, riječ je o tzv. „egzotičnoj“ valuti. S obzirom na to da konverzija nije moguća, a jedini način konverzije jeste da se isti novac pošalje u obliku vrijednosne pošiljke u Ukrajinu ili da se pošalje putem ovlaštenih kurira, a isto nije isplativo zbog male protuvrijednosti predmetnog novca, donesena je odluka da se isti novac drži deponovan u sefu Agencije.

U izvještajnom periodu predmetni novac se i dalje drži deponovan u sefu Agencije.

Zbog navedenog, odnosno zbog objektivnih razloga, iako je riječ o pravosnažnoj presudi, ovaj predmet nije priveden svom kraju.

### **Poklon i prodaja trajno oduzete imovine**

**Presuda Općinskog suda u Gračanici broj: 27 0 K 040830 18 K od 6. 5. 2019. godine**

Predmetnom presudom od optuženog lica oduzima se teretno motorno vozilo „MERCEDES BENZ“ tip Atego 1223, VIN: WDB9702551K879018 i povjerava se na čuvanje i upravljanje Federalnoj agenciji za upravljanje oduzetom imovinom. S obzirom na to da Agencija nije službenim putem od Općinskog suda u Gračanici zaprimila predmetnu presudu, službenici Agencije su sačinili dopis koji je 17. 6. 2019. godine, upućen Općinskom sudu u Gračanici kojim se traži informacija o statusu ovog predmeta, te da se dostavi pravosnažna presuda na dalje postupanje. Dana 15. 7. 2019. godine Općinski sud u Gračanici dostavio je navedenu presudu koja je pravosnažna i izvršna dana 28. 5. 2019. godine. Zbog popunjenosti skladišnih kapaciteta Agencije, dana 15. 7. 2019. godine Agencija je uputila Zahtjev za privremeno skladištenje motornog vozila prema Federalnoj direkciji robnih rezervi broj: 03-11-196-4/19. Dana 16. 7. 2019. godine Agencija je zaprimila odgovor na zahtjev od Federalne direkcije robnih rezervi u kojem potvrđuju saglasnost da se predmetno vozilo uskladišti u skladištu Federalne direkcije robnih rezervi na adresi Arnautovići b.b. u Visokom. Preuzimanje predmetnog vozila i dokumentacije vezane



za vozilo izvršeno je 17. 7. 2019. godine u mjestu Pribava b.b. Općina Gračanica i prevezeno u skladište Federalne direkcije robnih rezervi, o čemu je sačinjen Zapisnik o primopredaji oduzete imovine/teretno motorno vozilo broj: 03-11-196-6/19. Na osnovu Zahtjeva Agencije, dana 19. 7. 2019. godine izvršena je procjena vrijednosti teretnog motornog vozila od strane stalnog sudskog vještaka iz oblasti mašinske struke, te je vozilo procijenjeno na 18.513,12 KM. Agencija je o izvršenom preuzimanju obavijestila nadležni sud i zatražila da se rezervni ključevi od vozila, koji se nalaze u prostorijama suda, službenim putem dostave Agenciji, što je nadležni sud i učinio 25. 7. 2019. godine. Na osnovu Zakona o oduzimanju nezakonito stečene imovine krivičnim djelom FBiH, direktor Agencije je donio odluku o prodaji predmetnog motornog vozila u skladu s procijenjenom vrijednošću vozila. Prva prodaja-javno nadmetanje objavljeno je 26. 7. 2019. godine u tri javna glasila. S obzirom na to da nije pristigla niti jedna ponuda na prvom javnom nadmetanju, prodaja je proglašena nevažećom. Druga prodaja-javno nadmetanje objavljeno je 9. 8. 2019. godine, također u tri javna glasila sa cijenom umanjenom za 30% od procijenjene. Također, ni po drugom javnom nadmetanju nije pristigla niti jedna ponuda, te je i druga prodaja proglašena nevažećom.

Prema Zakonu o oduzimanju nezakonito stečene imovine krivičnim djelom FBiH (Sl. novine FBiH broj: 71/14), članom 32. precizirano je da ukoliko se dvije prodaje proglase nevažećom, direktor Agencije može donijeti Odluku o poklonu u humanitarne svrhe instituciji koja se primarno finansira iz Budžeta Federacije Bosne i Hercegovine. S obzirom na to da u dva javna nadmetanja nije pristigla niti jedna ponuda, službenici Agencije uputili su Federalnom ministarstvu finansija, Federalnom ministarstvu pravde, te Uredu za zakonodavstvo i usklađenost sa propisima EU, zahtjev za mišljenje o Prijedlogu odluke o poklonu motornog vozila Federalnoj upravi civilne zaštite. Nakon dobijenog pozitivnog mišljenja za poklanjanje trajno oduzetog motornog vozila, a na osnovu prijedloga odluke o poklonu motornog vozila (kamion) „Mercedes Benz – Atego 1223“ i druge auto opreme, Federalnoj upravi civilne zaštite od Federalne agencije za upravljanje oduzetom imovinom broj: 03-11-196-24/19 od 18. 10. 2019. godine upućenog Vladi Federacije Bosne i Hercegovine, donesena je Odluka Vlade broj: V.1221/2019 od 24. 10. 2019. godine kojom se poklanja motorno vozilo (kamion) „Mercedes Benz – Atego 1223“ s pratećom dokumentacijom i dvama ključevima za startanje vozila. Primopredaja navedene auto opreme izvršena je 5. 11. 2019. godine na lokaciji Arnautovići bb u Visokom službenicima Federalne uprave civilne zaštite o čemu je sačinjen i Zapisnik o primopredaji broj: 03-11-196-28/19 od 5. 11. 2019. godine.

**Na osnovu presude Kantonalnog suda u Tuzli br. 03 0 K 011879 14 K od 19. 12. 2014. godine** utvrđeno je da se od osuđenih lica oduzima nezakonito stečena imovina i to pokretne stvari različite vrste, te građevinski materijal. U 2017. godini predmetne pokretne stvari i građevinski materijal su preuzeti i deponovani u skladište Agencije.

U izvještajnom periodu, 30. 1. 2019. godine, dio preostalih stvari iz presude, koje nisu poklonjene ili prodane u 2018. godini i to, alat i radne mašine, na osnovu Odluke Vlade Federacije Bosne i Hercegovine, a na prijedlog direktora Agencije, poklonjeni su Službi za zajedničke poslove organa i tijela Federacije Bosne i Hercegovine.




Preostale stvari oduzete predmetnom presudom, a koje nisu prodane niti poklonjene, nalaze se u skladištu Agencije u Rakovici i redovno se vrši provjera stanja istih prilikom obilaska skladišta.

**Na osnovu presude Općinskog suda u Kaknju broj: 36 0 K 035746 17 Kps od 25. 9. 2017. godine** utvrđeno je da se od osuđenih lica trajno oduzimaju pokretne stvari različite vrste. Službenici Sektora su izvršili preuzimanje predmetnih stvari, te ih deponovali u skladište u Rakovici.

S obzirom na to da na dvije javne prodaje nije bilo prijavljenih lica, u sklopu poklona vozila „MERCEDES BENZ“, a na osnovu Odluke o poklonu u humanitarne svrhe Federalnoj upravi civilne zaštite, iz ovog predmeta poklonjeni su akumulator marke Warta C 14 12 V Ah 480 a, dva komada auto guma marke Fulda Kristall control HP 196/60, profil 15, dva komada auto guma marke Firestone profil 205/55 R16.

Preostale stvari oduzete predmetnom presudom, a koje nisu poklonjene, nalaze se u skladištu Agencije u Rakovici i redovno se vrši provjera stanja istih prilikom obilaska skladišta.

U izvještajnom periodu Federalna agencija za upravljanje oduzetom imovinom je postupala po sudskim presudama kojima je trajno oduzeta nezakonito stečena imovinska korist u vrijednosti od **1.318.947,41 KM**. U toku ovog izvještajnog perioda na osnovu nezakonito stečene imovinske koristi Agencija je u **Budžet Federacije Bosne i Hercegovine** uplatila iznos od **23.238,85 KM**.



**Grafikon 6:** Vrijednost trajno oduzete imovinske koristi u izvještajnom periodu



U narednom periodu u slučaju trajnog oduzimanja drugih vrsta nezakonito stečene imovine, Agencija će i dalje slijediti praksu Evropske unije, odnosno EU Direktive o zamrzavanju i oduzimanju prihoda i imovinske koristi ostvarene krivičnim djelima (2014/42/EU, 2014) u slučaju da nakon drugog kruga javna prodaja ne uspije, predložiti Vladi Federacije Bosne i Hercegovine donošenje odluke o postupanju predmetnom imovinom modalitetom – korištenje ili poklon.

Naime, korištenje ili poklon oduzete imovine, odnosno ponovna društvena upotreba je jedan od preporučenih načina upravljanja oduzetom imovinom jer se time jača povjerenje građana u sistem krivičnog pravosuđa i javnu vlast, intezivniji angažman i učešće građana kroz saradnju s vladinim institucijama.

Kod ovog modaliteta konkretan oblik oduzete imovine se predaje u vlasništvo i/ili posjed, odnosno na korištenje nevladinim i humanitarnim organizacijama, obrazovnim i zdravstvenim ustanovama i slično ili se sredstva od prodaje imovine usmjeravaju u neke specifične fondove, projekte ili konkretne programe.

#### **4.3. OPERATIVNI CILJ 3 – PROVOĐENJE ANALIZA U PODRUČJU ODUZIMANJA IMOVINSKE KORISTI PRIBAVLJENE KRIVIČNIM DJELOM**

Jedna od nadležnosti Agencije utvrđenih članom 30. Zakona o oduzimanju nezakonito stečene imovine krivičnim djelom je i provođenje analiza u području oduzimanja imovinske koristi pribavljene krivičnim djelom.

U skladu sa članom 31. Zakona, Agencija u provođenju ove nadležnosti obavlja sljedeće poslove:

- prikuplja od nadležnih institucija podatke, statističke izvještaje i druge informacije iz pravomoćno okončanih postupaka za oduzimanje imovinske koristi u skladu sa Zakonom, s ciljem obrade i analize tih podataka i informacija, uočavanja trendova u vršenju krivičnih djela iz kojih se pribavlja imovinska korist;
- vrši analize i procjene rizika s ciljem identifikacije faktora i okolnosti koji pogoduju pribavljanju imovinske koristi iz vršenja krivičnih djela;
- obavještava Vladu Federacije i Parlament Federacije o rezultatima analiza u području provođenja zakona ili drugih propisa o finansijskim istragama i oduzimanju imovinske koristi pribavljene krivičnim djelom.

Pošto je prikupljanje podataka o privremeno i trajno oduzetoj imovinskoj koristi zakonska obaveza koja je usklađena s Direktivom Evropskog parlamenta i Vijeća Evrope 2014/42/EU o zamrzavanju i oduzimanju predmeta i imovinske koristi ostvarene krivičnim djelima u Evropskoj uniji od 3. 4. 2014. godine, kao i bitan instrument procjene učinkovitosti same mjere oduzimanja te imovine, Agencija je i u ovom izvještaju poduzele određene korake prema realizaciji ovog cilja.

U skladu s navedenim, Agencija je uputila zahtjeve kantonalnim i općinskim sudovima, te nadležnim tužilaštvima u skladu sa pripadajućim obrascima Smjernica, za period od 1. 1. 2019. godine do 31. 12. 2019. godine, a koji su se odnosili na:



- a) zbirne podatke o radu suda;
- b) podatke o pojedinačnim postupcima u kojima je određeno oduzimanje imovinske koristi;
- c) podatke o privremeno oduzetoj imovinskoj koristi iz pojedinačnih postupaka;
- d) podatke o trajno oduzetoj imovinskoj koristi iz pojedinačnih postupaka i
- e) podaci koji se odnose na prijedloge nadležnim sudovima u oblasti oduzimanja imovinske koristi pribavljene krivičnim djelom kojim se određuju privremene mjere radi osiguranja imovinske koristi pribavljene krivičnim djelom, s posebnim osvrtom na podatke koji se odnose na sva rješenja donesena na osnovu prijedloga tužilaštava, kojima su određene privremene mjere osiguranja imovinske koristi u skladu s članom 17. Zakona, a čija svrha nije povjeravanje takve imovine Agenciji, već samo blokada, odnosno zamrzavanje iste, u skladu s obrascem broj 3 Smjernica, kao i na sve prijedloge tužilaštava nadležnim sudovima za oduzimanje imovinske koristi pribavljene krivičnim djelom u kojima je predloženo donošenje privremenih mjera osiguranja imovinske koristi u skladu s članom 17. Zakona, a čija svrha nije povjeravanje takve imovine Agenciji, već samo "blokada", odnosno zamrzavanje iste, s vrstom i vrijednošću te imovine, kao i podatke o prihvaćenim ili odbijenim prijedlozima tužilaštava upućenim nadležnim sudovima za određivanjem gore navedenih mjera od strane istih.

Prikupljene podatke ćemo objediniti i prikazati u narednom izvještajnom periodu.

Odjel za IKT sekretarijata Visokog sudskog i tužilačkog vijeća je u protekloj godini nakon zajedničkih aktivnosti i usaglašavanja s Agencijom započeo nadogradnju, odnosno razvoj Modula za evidentiranje oduzete imovine stečene krivičnim djelom, u sklopu Sistema za automatsko upravljanje predmetima u sudovima i tužilaštvima (CMS/TCMS), a koji je skladu sa Smjernicama koje je sačinila Agencija.

Kako nadogradnja Modula za evidentiranje oduzete imovine stečene krivičnim djelom još uvijek nije realizovana, u vezi s navedenim, i u ovom izvještajnom periodu predstavnici Agencije su održali više radno-konsultativnih sastanka s predstavnicima Visokog sudskog i tužilačkog vijeća, koji ima najvažniju ulogu o pitanju vođenja Sistema za automatsko upravljanje predmetima (CMS) u kojem se, između ostalog, generiraju i podaci o ovoj vrsti sudskih postupaka, tj. izrečenih mjera u krivičnim postupcima, te smo na istim upoznati da se aktivnosti oko realizacije nadogradnje ovog sistema privode kraju.

U prethodnom izvještajnom periodu Agencija je sačinila Analizu podataka u kojima je predložena i izrečena mjera oduzimanja imovinske koristi pribavljene krivičnim djelom u Federaciji Bosne i Hercegovine za period od 1. 1. 2018. godine do 31. 12. 2018. godine, koju je Vlada Federacije Bosne i Hercegovine Zaključkom V. broj: 488/2019 od 9. 5. 2019. godine primila na znanje i istu dostavila Parlamentu Federacije Bosne i Hercegovine u dalju proceduru.

Predstavnički dom Parlamenta Federacije je Obavješću broj: 01-02-1002/19 od 21. 11. 2019. godine obavijestio Agenciju da je razmatrao i primio k znanju Informaciju Agencije koja se odnosi na analizu podataka dostavljenih od sudova i tužilaštava u FBiH u kojima je predložena i izrečena mjera oduzimanja imovinske koristi pribavljene krivičnim djelom u F BiH u periodu 1. 1 – 31. 12. 2018. godine.



U okviru ovog operativnog cilja, Agencija je započela aktivnosti koje se odnose na implementaciju člana 31. stav (1) tačke j) i k) Zakona, koji se odnosi na izradu prijedloga Strategije za oduzimanje imovinske koristi pribavljene krivičnim djelom u Federaciji Bosne i Hercegovine i Akcionog plana za njeno izvršenje.

Procesom pridruživanja Bosne i Hercegovine Evropskoj uniji proistekle su obaveze države da izvrše usklađivanje postojećih propisa s međunarodnim konvencijama i evropskim standardima, uključujući i obavezu usklađivanja propisa iz oblasti oduzimanja i upravljanja imovinom stečenom izvršenjem krivičnog djela. Kao potpisnica niza konvencija i međunarodnih dokumenata, Bosna i Hercegovina se obavezala osigurati standarde za trajno oduzimanje prihoda stečenih krivičnim djelom, kao i ostvarivanje neophodne međunarodne saradnje s ciljem privremenog ili trajnog oduzimanja imovinske koristi pribavljene izvršenjem krivičnog djela.

Kako do sada prijedlog iste nije sačinjen, a kako bi doprinijeli izvršavanju preuzetih međunarodnih obaveza, jedan od glavnih zadataka Agencije u narednom periodu bit će donošenje Strategije za oduzimanje imovinske koristi pribavljene krivičnim djelom i Akcionog plana za njeno izvršenje, kojim bi se kreirala politika u oblasti oduzimanja i upravljanja imovinom stečenom izvršenjem krivičnog djela.

Strategija bi predstavljala prvi dokument na izgradnji jedinstvene politike u oblasti oduzimanja i upravljanja imovinskom koristi pribavljenom krivičnim djelom, te definisala strateške prioritete, ciljeve i aktivnosti u oblasti oduzimanja i upravljanja imovinom stečenom izvršenjem krivičnog djela u Federaciji Bosne i Hercegovine za petogodišnje strateško razdoblje.

Strategija bi unaprijedila spremnost Federacije Bosne i Hercegovine za daljim jačanjem kapaciteta u procesu oduzimanja imovinske koristi i procesu upravljanja i ovim dokumentom bi se definisali pravci djelovanja u ovoj oblasti na cijelom području Federacije Bosne i Hercegovine.

Agencija je, kako je već navedeno, u izvještajnom periodu započela aktivnosti oko planiranja pripreme izrade Strategije, te je urađena radna verzija prijedloga Plana za sačinjavanje prijedloga Strategije za oduzimanje imovinske koristi pribavljene krivičnim djelom i u tom kontekstu održano je više sastanaka s pravosudnim i ostalim institucijama oko planiranja početnih aktivnosti.

Planom rada za 2020. godinu Agencija je predvidjela određena finansijska sredstva za izradu iste, međutim kako je odobren manji budžet od planiranog, u narednom periodu će prema Vladi Federacije Bosne i Hercegovine biti upućen zahtjev za izmjenu i dopunu Budžeta.



**4.4. OPERATIVNI CILJ 4 – UNAPREĐENJE SARADNJE I KOORDINACIJE IZMEĐU AGENCIJE, PRAVOSUDNIH ORGANA, POLICIJSKIH AGENCIJA I DRUGIH INSTITUCIJA KOJE IMAJU OBAVEZU POSTUPATI PO ODREDBAMA ZAKONA, KAO I DRUGIH PRAVNIH SUBJEKATA U BOSNI I HERCEGOVINI, TE USPOSTAVLJANJE I UNAPREĐENJE SARADNJE S ISTIM ILI SLIČNIM AGENCIJAMA IZ ZEMALJA REGIJE I EVROPSKE UNIJE, KAO I KONTINUIRANA EDUKACIJA UPOSLENIKA NAVEDENIH INSTITUCIJA KOJI SU DIREKTNO U VEZI S PROCESOM ODUZIMANJA NEZAKONITO STEČENE IMOVINSKE KORISTI**

**Stručno obrazovanje i usavršavanje**

Stručno usavršavanje državnih službenika i namještenika, odnosno izgrađivanje i usavršavanje ljudskih kapaciteta u izvještajnom periodu se odvijalo u skladu s Pravilnikom o stručnom obrazovanju i usavršavanju uposlenih u Agenciji, te Programom i planom stručnog obrazovanja i usavršavanja državnih službenika i namještenika Agencije za 2019. godinu.

Kako je stručno obrazovanje i usavršavanje državnih službenika i namještenika zakonska obaveza koja ima za cilj da se isti stručno osposobe za efikasno i kvalitetno obavljanje svih poslova svog radnog mjesta, kao i da se stalno stručno usavršavaju, te time povećavaju svoje profesionalne kompetencije, isto je u ovom izvještajnom periodu doprinijelo unapređenju znanja, vještina i sposobnosti državnih službenika i namještenika, a time i uspješnijem obavljanju njihovih svakodnevnih poslova.

Tokom izvještajnog perioda, a na osnovu Programa i plana stručnog obrazovanja i usavršavanja, kao i učestvovanja u programima obuka koje su organizovali predstavnici međunarodnih institucija, uposleni u Agenciji su prisustvovali sljedećim radionicama, seminarima i obukama:

U okviru nastavka implementacije dokumenta Agencije za državnu službu Federacije Bosne i Hercegovine „Program kontinuiranog stručnog usavršavanja državnih službenika i namještenika u 2019. godini“ u izvještajnom periodu je održana obuka o novom Pravilniku o kancelarijskom poslovanju, na kojoj su prisustvovali i predstavnici Agencije i čija je svrha bila da se ojačaju kapaciteti uposlenih iz oblasti praktične primjene propisa o kancelarijskom poslovanju.

Osim navedenih, predstavnici Agencije su učestvovali i u implementaciji dokumenta Javne ustanove Centar za edukaciju sudija i tužilaca Federacije Bosne i Hercegovine „Program početne obuke i program stručnog usavršavanja za 2019. godinu“, te u okviru istog, u izvještajnom periodu prisustvovali XII savjetovanju tužilaca u Bosni i Hercegovini.

Savjetovanje je održano u organizaciji Udruženja tužilaca Federacije Bosne i Hercegovine, Republike Srpske i Bosne i Hercegovine, koji su u saradnji s Centrom za edukaciju sudija i tužilaca Federacije Bosne i Hercegovine, Centrom za edukaciju sudija i tužilaca Republike Srpske, organizovali navedeno savjetovanje u Neumu.



Savjetovanje se održalo u više panela koji su bili posvećeni aktuelnim pitanjima iz oblasti korupcije, privrednog i organizovanog kriminala, odnosno oduzimanja nezakonito stečene imovine krivičnim djelom, ratnih zločina, trgovine ljudima, nasilja nad ženama i djecom u digitalnom okruženju, maloljetnicima u krivičnom postupku, te modalitetima i prevenciji zloupotrebe migracija i azila. Tokom trajanja savjetovanja prisutni su imali priliku razmijeniti znanja i iskustva iz navedenih oblasti, ali i razgovarati o problemima s kojima se susreću u svakodnevnom radu.

Agencija je na osnovu prijedloga i inicijative Ministarstva sigurnosti Bosne i Hercegovine od 2017. uključena u realizaciju projekta IPA 2013 Twinning projekat "Podrška borbi protiv pranja novca", čiji je cilj podizanje kapaciteta u Bosni i Hercegovini koji se odnose na prevenciju pranja novca i finansiranja terorizma, s posebnim naglaskom na finansijske istrage, te je i u ovom izvještajnom periodu učestvovala u sljedećim komponentama navedenog projekta:

- rezultat 3. – Podrška borbi protiv pranja novca, odnosno oduzimanje nezakonito stečene imovine-davanje prijedloga, gdje se raspravljalo o poboljšanju efikasnosti struktura za oduzimanje imovine rješavanjem aktuelnih nedostataka, kao i identifikacije načina za poboljšanje saradnje i koordinacije sa svim relevantnim organima zemalja korisnica;
- rezultat 5. – Podrška borbi protiv pranja novca, kriptovalute i njihova upotreba za kriminalne aktivnosti i pranje novca;
- rezultat 7. – Podrška borbi protiv pranja novca, odnosno zajedničke obuke za istražitelje, sudije i tužioce;
- rezultat 8. – Podrška borbi protiv pranja novca, prenošenje i razmjena najboljih praksi o sprečavanju pranja novca i finansiranja terorističkih aktivnosti i saradnje s privatnim sektorom.

Predstavnici Agencije su također u izvještajnom periodu nastavili učestvovati u aktivnostima Ureda Ujedinjenih nacija za drogu i kriminal (UNODC) u okviru regionalnog programa „Mjerenje i procjena organizovanog kriminala na Zapadnom Balkanu“, te dijela projekta koji se odnosi na Misiju procjene dostupnosti podataka u Bosni i Hercegovini.

U ovom periodu je Ured specijalnog predstavnika EU u Bosni i Hercegovini organizovao javnu debatu „Pravo na pravdu“ gdje je predstavljena zajednička odgovornost svih, uloga vlada i parlamenata u unapređenju vladavine prava i kulture vladavine prava, te u organizaciji Info centra Evropske unije u Bosni i Hercegovini javna debata na temu „EU i BiH – zajedno za jaču vladavinu prava“ – pregled reforme vladavine prava u BiH kroz prizmu EU projekata, na kojima su prisustvovali i predstavnici Agencije.

Osim navedenih, predstavnici Agencije su također prisustvovali specijalističkoj obuci koju je organizovalo Ministarstvo unutrašnjih poslova Kantona Sarajevo, čija je svrha bila upoznavanje policijskih službenika s radom različitih institucija koji učestvuju u sistemu istraživanja i procesuiranja korupcije, te oduzimanja nezakonito stečene imovine krivičnim djelom.

Na poziv organizatora, predstavnik Federalne agencije za upravljanje oduzetom imovinom je prisustvovao navedenoj obuci kao predavač, odnosno edukator, te je



nakon upoznavanja učesnika s radom Agencije, prezentovao upravljanje oduzetom imovinom u krivičnom postupku u Federaciji Bosne i Hercegovine.

Obuke koje su prošli službenici Agencije u ovom izvještajnom periodu su još jedna u nizu aktivnosti koje pružaju doprinos unapređenju rada i reformskim procesima javne uprave, te doprinose efikasnijem upravljanju oduzetom imovinom i utemeljenju kompletnog postupka oduzimanja nezakonito stečene imovine kao značajnog instituta u krivično-pravnoj normativi Federacije Bosne i Hercegovine.

### **Međuagencijska balkanska mreža za povrat imovine (BAMIN)**

Federalna agencija za upravljanje oduzetom imovinom je od 2017. godine član BAMIN mreže (Balkan Asset Management Inter-Agency Network). BAMIN mreža je formirana 2014. godine i sastoji se od vladinih agencija iz osam zemalja zapadnog Balkana koje su odgovorne za upravljanje i raspolaganje imovinom koja je oduzeta od kriminalaca. Članice BAMIN mreže su: Albanija, Bosna i Hercegovina, Bugarska, Hrvatska, Kosovo, Makedonija, Crna Gora i Slovenija.

BAMIN mreža za cilj ima unapređenje međuagencijske saradnje u pogledu efikasnog upravljanja oduzetom imovinom stečenom izvršenjem krivičnih djela, njene eventualne prodaje ili povrata, te razmjene informacija o istom. U radu BAMIN-a učestvuju i zemlje posmatrači koje nisu s područja zapadnog Balkana, a koje svojim iskustvom doprinose razvoju boljih praksi u pogledu upravljanja oduzetom imovinom, a to su trenutno Ujedinjeno Kraljevstvo, Belgija, Irska, Ukrajina i Moldavija.

Kao predsjedavajuća BAMIN mrežom u 2019. godini, Agencija je u ovom izvještajnom periodu bila domaćin održavanja Generalne skupštine BAMIN mreže, čije održavanje je finansirala Evropska unija (EU) i Organizacija za evropsku sigurnost i saradnju (OSCE). Skupština se održala u periodu 29 – 31. oktobar 2019. godine u Neumu.

U okviru održavanja Generalne skupštine održan je prvo sastanak Upravnog odbora BAMIN-a na kojem su predstavljeni dosadašnji rezultati rada ove mreže, zatim moguće proširenje članstva, te buduće aktivnosti vezane za unapređenje oblasti upravljanja nezakonito stečenom imovinskom koristi.

Na konferenciji koja je okupila 70 učesnika iz relevantnih institucija Bosne i Hercegovine, međunarodnih institucija u Bosni i Hercegovini, te predstavnika agencija iz zemalja okruženja i omogućila da se kroz najbolje prakse i studije slučaja predstave iskustva u upravljanju i raspolaganju pojedinim oblicima imovine – privremeno i trajno oduzete u krivičnim postupcima u zemljama regiona i Bosni i Hercegovini, doneseni su sljedeći zaključci i preporuke:

- BAMIN je zaključio da postoji značajno iskustvo u upravljanju umjetničkim djelima, skulpturama i imovinom od naučne vrijednosti. Ovo iskustvo bi trebalo biti dokumentovano i podijeljeno između članova BAMIN mreže, posebno onim koji imaju tu vrstu upravljačkog iskustva u korist svih BAMIN članica.
- Upravljanje autima kao imovinom ostaje jedan od najvećih izazova za članice BAMIN-a. Nastavak komunikacije je neophodan kako bi se zemlje članice ohrabrile da usvoje potrebne politike i smjernice koje bi im omogućile da prodaju automobile tokom sudskog postupka, unutar šest mjeseci od datuma zaplijene.



- Upravljanje kompanijama i njihovom imovinom ostaje područje značajnog izazova u radu BAMIN agencija. Korektan balans između tehničkih ekspertiza unutarnjih kapaciteta (uključujući ekonomiste, pravnike i specijaliste za biznis) i vanjskih eksperata koji se pozivaju radi upravljanja kompanijama je preduslov uspjeha. Agencije bi se trebale fokusirati na stvaranje internih procedura i upravljačkih dokumenata za upravljanje kompanijama. Njihov fokus, bi između ostalog, trebao uključiti, naprimjer, kako promijeniti i izabrati uposlenike, kako osigurati pravilno finansiranje za dalje investicije i kako efikasno implementirati marketinške kampanje.
- Ponovno društveno korištenje ostaje najbolja praksa sa snažnom podrškom Evropske Unije. Ovo bi se prevashodno trebalo fokusirati na nekretnine, te biznise. Obnovljeno korištenje bi trebalo biti razmotreno kao opcija kad god je to moguće nakon konačne konfiskacije. Ponovno korištenje, naprimjer automobila, tokom sudskog procesa, može dovesti do komplikovnih pravnih procedura kada se optuženici oslobode pa se imovina ima vratiti. Zbog toga bi se to trebalo izbjegavati u sudskom postupku prije presude. Iako neki programi ponovnog društvenog korištenja već postoje u regiji, neophodno je nastaviti raditi na ovom pitanju kako bi se poboljšala i uskladila legislativa i praksa.
- On-line aukcije su važan mehanizam koji bi agencije trebale razmotriti u prodaji imovine bilo na bazi izrade vlastitih platformi ili putem potpisivanja Ugovora s privatnim aukcijskim kućama. Uvećana vidljivost i veći pristup koji omogućavaju aukcije garantiraju veći prihod od prodaje vrijednosti, što u konačnici predstavlja bolji rezultat kako za državu, tako i za moguće žrtve, ali i vlasnike imovine.
- BAMIN ponovo potcrtava i slaže se da je planiranje prije zaplijene važno u zaštiti i optimizaciji vrijednosti imovine. Agencije za upravljanje imovinom trebaju nastaviti razvijati znanja i sposobnosti u ovom području, kako bi bili vodiči službama za sprovođenje zakona, tužiocima i sudovima u najuspješnijim metodama i načinima upravljanja imovinom.
- BAMIN sugerira da članice BAMIN-a iniciraju usvajanja amandmana ili donošenje novih zakonskih rješenja i procedura koje bi osigurale efektivnije upravljanje privremeno oduzete imovine, posebno u odnosu na privremeno oduzeta vozila i kompanije.
- BAMIN će u formatu smjernica izraditi dokument o "Minimalnim pravnim standardima za upravljanje imovinom" koji bi definirao standarde kako za privremeno zamrznutu i oduzetu imovinu, tako i trajno konfiskovanu vrijednost bazirano na iskustvima zemalja članica. Ovo će biti baza za zainteresirane članice koja bi inicirala usvajanje i dopune zakonodavstva i procedura koje bi uspostavile efikasniji sistem za upravljanje zamrznutom, oduzetom i konfiskovanom imovinom.

Agencija će u skladu s funkcijom koju obavlja, nastaviti aktivnosti razmjene mišljenja i iskustava, kao i poboljšanja i unapređenja međunarodne i međuinstitucionalne saradnje svih tijela u regionu koji upravljaju imovinom koja se oduzima od organizovanog kriminala i drugih oblika kriminala, sve do službene predaje predsjedavanja BAMIN mrežom Republici Crnoj Gori.

Uposleni u Agenciji su, osim kontakata ostvarenih preko BAMIN mreže, nastavili već unaprijed ostvarenu saradnju s agencijama iz regiona gdje su u redovnim kontaktima razmjenjivane informacije o oblicima oduzimanja, preuzimanja i



upravljanja raznim oblicima imovine, načinu rješavanja, pristupu i drugim pitanjima važnim za upravljanje imovinom stečenom izvršenjem krivičnog djela, te je ocijenjeno da su kontakti sa stručnjacima iz regije u ovoj oblasti i razmjena iskustava u daljem postupanju s tom imovinom bili od velikog značaja za dostizanje standarda Evropske unije u ovoj oblasti.

### **Saradnja i provođenje projekata kroz međunarodno finansiranje**

Predstavnici Agencije su u ovom izvještajnom periodu prisustvovali Drugom sastanku Upravnog odbora projekta **EU4Justice** koji se odnosi na podršku u borbi protiv organizovanog kriminala i korupcije u Bosni i Hercegovini na kojem je predstavljen Prelazni izvještaj i izvještavanje o provedenim aktivnostima u datom izvještajnom periodu i budućim aktivnostima.

Projekat se finansira iz sredstava Evropske unije, a implementira ga GIP Justice Cooperation Internationale. Opći cilj projekta je unapređenje učinkovitosti, integriteta i profesionalnosti institucija sektora vladavine prava, što će pomoći poboljšanju saradnje između tužilaštava i agencija za provedbu zakona u svrhu povećanja efikasnosti istraga u predmetima organizovanog kriminala i korupcije.

Projekat ima pet komponenti, a jedna od komponenti je i „Unapređenje sadašnje prakse i rezultata u pogledu zaplijene i oduzimanja nezakonito stečene imovine“. U okviru navedene komponente predviđene su tri aktivnosti u kojima će učestvovati predstavnici Agencije.

S ciljem realizacije navedenih aktivnosti u izvještajnom periodu održano je više radnih sastanaka s predstavnicima projekta, na kojima su razmatrana pitanja koja se odnose na unapređenje sadašnje prakse i rezultata u pogledu zaplijene i oduzimanja nezakonito stečene imovine. Na sastancima su predstavljene aktivnosti predviđene navedenom komponentom, a koje obuhvataju provođenje analiza učinkovitosti implementacije primjenjivih zakona na oduzimanje nezakonito stečene imovine, s naglaskom na pokretanje postupka i preprekama za izvršenje, ocjena infrastrukture i raspoloživih sredstava Agencije s posebnim naglaskom na informatičke zahtjeve i predstavljanje utvrđenih nedostataka relevantnim vlastima i predlaganje rješenja.

U okviru projektne saradnje, koja će doprinijeti jačanju kapaciteta Agencije i drugih subjekata koji učestvuju u postupku oduzimanja imovinske koristi stečene krivičnim djelom, u dvodnevnoj posjeti Agenciji bio je i počasni zamjenik glavnog tužitelja u Francuskoj, ekspert s bogatim iskustvom u finansijskim pitanjima, oduzimanju i konfiskaciji imovine.

Federalna agencija za upravljanje oduzetom imovinom je u svojstvu članice sektorske radne grupe za IPA II sektor Pravda i osnovna prava učestvovala aktivno u izradi sektorskog planskog dokumenta, te u sklopu izrade AD-a "EU Support to the Justice Sector" finansiranog iz IPA 2019 državnog paketa pomoći, predložila finansiranje izrade softvera i IT usluga u okviru potreba za obnovom materijalnih, tehničkih i smještajnih kapaciteta institucija nadležnih za upravljanje oduzetom imovinom u BiH.

U skladu s našim zahtjevom, u prethodnom izvještajnom periodu nakon što je Ministarstvo pravde Bosne i Hercegovine obavijestilo Agenciju da će podrška tijelima



za upravljanje oduzetom imovinom biti dio pomenutog IPA 2019 AD-a, a čija bi implementacija trebala otpočeti, prema procjenama, tek početkom 2024. godine, Agencija je putem Direkcije za evropske integracije uputila zahtjev Delegaciji Evropske unije u Bosni i Hercegovini na razmatranje mogućnosti za finansiranje pomenute nabavke kroz tzv. *European Integration Facility* instrument s ciljem pomoći razvoju Agencije.

U vezi s navedenim, u izvještajnom periodu održan je radni sastanak sa predstavnicima Delegacije Evropske unije u Bosni i Hercegovini, na kojem je izvršena stručna procjena zahtjeva, te su dogovorene dalje aktivnosti vezane za izradu softvera i IT usluga u Agenciji.

Sastanci ovakve vrste će se održavati i u budućnosti s ciljem dobre saradnje i efikasnijeg rada kada je u pitanju primjena Zakona i rad Agencije.

### **Saradnja između Agencije i drugih institucija**

U okviru aktivnosti Federalne agencije za upravljanje oduzetom imovinom u 2019. godini koje se tiču uspostavljanja međuinstitucionalne saradnje sa svim subjektima koji imaju obavezu postupati prema odredbama Zakona o oduzimanju nezakonito stečene imovine krivičnim djelom u Federaciji Bosne i Hercegovine, predstavnici Agencije su održali radne sastanke s predstavnicima Kantonalnog tužilaštva u Tuzli, Kantonalnog suda u Tuzli i Općinskog suda u Tuzli.

Na sastancima se razgovaralo o nastavku primjene Zakona o oduzimanju nezakonito stečene imovine krivičnim djelom u Federaciji Bosne i Hercegovine i međuinstitucionalnoj saradnji prilikom donošenja i provođenja odluka o oduzimanju imovinske koristi u skladu s odredbama istog Zakona.

Jedna od tema sastanaka je bila i stručna edukacija iz područja finansijskih istraga i oduzimanja imovinske koristi pribavljene krivičnim djelom, kao i sačinjavanje prijedloga Strategije za oduzimanje imovinske koristi pribavljene krivičnim djelom u Federaciji Bosne i Hercegovine i Akcionog plana za njeno izvršenje, te su sugovornici upoznati s planiranim aktivnostima Agencije vezanim za ove nadležnosti u narednom periodu.

Osim navedenih, sastanci su održani i sa predstavnicima Federalnog tužilaštva, kantonalnih tužilaštava u Sarajevu, Bihaću i Zenici, a u vezi sa pitanjima koja regulišu Zakon o oduzimanju nezakonito stečene imovine krivičnim djelom.

Pošto Agencija ima značajnu ulogu u samom krivičnom postupku, koja se ogleda u osiguranju imovine koju joj nadležni sud povjeri, očuvanju njene vrijednosti i upravljanju istom u smislu sigurnosti i integriteta imovine, namjene i staranja do konačne odluke suda, odnosno završetka samog postupka, u razgovorima je dogovorena maksimalna saradnja u budućem periodu radi što kvalitetnije primjene Zakona u smislu adekvatnog provođenja odluka o oduzimanju nezakonito stečene imovine krivičnim djelom.

Predstavnici Agencije su u izvještajnom periodu također organizovali sastanke s predstavnicima Visokog sudskog i tužilačkog vijeća o navedenim pitanjima, kao i pitanjem nadogradnje CMS/TMS modula vezanog za oduzimanje imovinske koristi stečene krivičnim djelom na kojem se razgovaralo o funkcioniranju buduće „baze podataka o registraciji imovine“.



Osim toga, predstavnici Agencije su održavali redovne sastanke s predstavnicima Sudske policije Federacije Bosne i Hercegovine, te vršili zajedničke pripremne aktivnosti i razmjenu operativnih informacija, kako bi u skladu s ovlaštenjima i obavezama proisteklim iz sudskih odluka, postavljeni zadaci bili realizovani u cijelosti i blagovremeno.

Saradnja s Federalnom upravom policije ostvarena u prethodnom periodu nastavljena je i u ovom izvještajnom periodu. S predstavnicima Federalne uprave policije održan je sastanak na kojem je precizirana i dogovorena trenutna i buduća operativna saradnja, kao i moguća saradnja oko provođenja edukativnih aktivnosti u narednom periodu, a koje se odnose na obuku državnih i policijskih službenika i nosilaca pravosudnih funkcija u vezi s finansijskim istragama i oduzimanjem imovinske koristi pribavljene krivičnim djelom.

Naime, Agencija je u izvještajnom periodu započela planiranje provođenja edukacija iz područja finansijskih istraga i oduzimanja imovinske koristi pribavljene krivičnim djelom.

U skladu s članom 30. stav (1) tačka c) Agencija je nadležna za stručnu edukaciju iz područja finansijskih istraga i oduzimanja imovinske koristi pribavljene krivičnim djelom. Shodno navedenom, članom 31. stav (1) tačka l) Zakona, Agencija u provođenju ove svoje nadležnosti u saradnji s drugim nadležnim institucijama učestvuje u obuci državnih i policijskih službenika i nosilaca pravosudnih funkcija u vezi s finansijskim istragama i oduzimanjem imovinske koristi pribavljene krivičnim djelom.

Provođenje finansijskih istraga s ciljem identifikacije, odnosno privremenog i trajnog oduzimanja imovine stečene krivičnim djelom predstavlja jedan od najefikasnijih načina borbe protiv organizovanog kriminala, korupcije i drugih imovinski motiviranih krivičnih djela. Uspjeh te borbe uslovljen je lišavanjem kriminalnih organizacija i pojedinaca bogatstva koji je ujedno najveći izvor njihove moći i pokretač daljnje kriminalne aktivnosti.

Zbog toga se udar na imovinu koja je pribavljena na nezakonit način smatra najtežim udarcem za počinioca teških krivičnih djela, a mjere usmjerene na oduzimanje imovine su procijenjene kao najbolja sredstva da se suzbiju organizovani kriminal i korupcija. Imovina koja vodi porijeklo iz različitih kriminalnih aktivnosti je u većem dijelu prikrivena, tako da provođenje finansijskih istraga zahtijeva složen, visokostručan i analitičan rad ovlaštenih službenih osoba koji je provode.

Međunarodna zajednica je prepoznala problem kriminalnog podrivanja ekonomske stabilnosti zemalja i uočila ozbiljnu opasnost različitih oblika manifestovanja organizovanog kriminala, te je kroz različite zakonske instrumente, odnosno međunarodne ugovore, svoju pažnju usmjerila na pitanje oduzimanja imovine proistekle iz krivičnog djela i uvela minimalne standarde za efikasan rad i saradnju u ovoj oblasti, te predvidjela usvajanje takvih mjera u zakonodavstvima država članica i država kandidata kojima će se omogućiti efikasno, blagovremeno i zakonito oduzimanje imovinske koristi.



Tako je na četvrtom sastanku Pododbora za pravdu, slobodu i sigurnost između Evropske unije i Bosne i Hercegovine, koji je održan u zgradi Evropske komisije u Briselu, posebna pažnja je bila usmjerena na pitanje edukacija iz oblasti finansijskih istraga i oduzimanja imovinske koristi. Predstavnicima Evropske komisije su svim prisutnim učesnicima preporučili unapređenje aktivnosti vezanih za stručne edukacije svih osoba koje učestvuju u postupcima provođenja finansijskih istraga i oduzimanja imovinske koristi stečene krivičnim djelom.

Potreba za stručnim osposobljavanjem posebno proizilazi iz činjenice što trenutno živimo u vrlo dinamičnom periodu stalnih izmjena zakona i podzakonskih akata s ciljem prilagođavanja zakonodavstva Bosne i Hercegovine sa zakonodavstvom Evropske unije. Također, nova naučna i tehnička dostignuća i široka primjena računara, različitih računarskih programa i sličnih uređaja, kao i korištenje brojnih informacionih sistema u funkcionisanju raznih službi, preduzeća i drugih subjekata su dovela do novih načina izvršenja krivičnih djela.

Da bi u tim novim okolnostima državni i policijski službenici i nosioci pravosudnih funkcija bili kompetentni da efikasno i pravilno primjenjuju propise u svom radu i kompetentni da koriste nove metode rada i tehnička sredstva, nužno je da se stalno stručno osposobljavaju za uspješno i kvalitetno obavljanje poslova. Iz tog razloga utvrđena je zakonska obaveza za državne i policijske službenike i nosioce pravosudnih funkcija da se stalno stručno usavršavaju i povećavaju svoje kompetencije.

Analizirajući podatke dobivene od agencija koje se bave ovom problematikom u zemljama regiona, uočeno je da sve one prednjače u odnosu na nas po broju provedenih finansijskih istraga, odnosno po broju oduzete imovine. Kao jedan od razloga za nedovoljan broj predmeta koji se dostavljaju Agenciji na dalje postupanje, a koji se odnose na oduzetu imovinu, Agencija je prepoznala u manjku edukativnih aktivnosti iz oblasti finansijskih istraga i oduzimanja imovinske koristi.

Iako je Zakon predvidio ovu nadležnost i povjerio je Agenciji, Agencija do sada nije učestvovala u obavljanju ovih aktivnosti.

U zadnjem kvartalu ovog izvještajnog perioda, na osnovu mnogobrojnih sastanaka obavljenih s nosiocima pravosudnih funkcija, koji su istakli postojanje nedovoljne educiranosti iz ove oblasti, na osnovu preporuka međunarodnih institucija, analitičkih pokazatelja iz zemalja regiona, ali u konačnici i zakonske odredbe o pitanjima stručne edukacije, Agencija je uradila radnu verziju Programa i plana stručnog obrazovanja i usavršavanja državnih i policijskih službenika i nosilaca pravosudnih funkcija u vezi s finansijskim istragama i oduzimanjem imovinske koristi pribavljene krivičnim djelom za 2020. godinu.

Također, Akcionim planom za realizaciju prioriteta iz Analitičkog izvještaja Evropske komisije institucije koje se bave provođenjem finansijskih istraga predvidjele su povećanje aktivnosti usmjerenih na finansijske istrage, te je i to bio jedan od pokazatelja da je potrebno uspostaviti jedan sistematizovan i kontinuiran način edukacije iz ove oblasti.

Istovremeno s izradom ovog plana i programa, Agencija je održala više sastanaka s Centrom za edukaciju sudija i tužilaca Federacije Bosne i Hercegovine, kao i Ekonomskim fakultetom u Sarajevu i Centrom za istraživanje politike suprostavljajnja



kriminalitetu (CPRC) u vezi s pitanjima koja se odnose na postupak edukacija, te planiranja zajedničkih aktivnosti oko realizacije istih.

Centar za edukaciju sudija i tužilaca Federacije Bosne i Hercegovine je prihvatio prijedlog Agencije, te je za narednu godinu predvidio u okviru svog programa i plana obuka i četiri obuke iz oblasti finansijskih istaga i oduzimanja imovinske koristi stečene krivičnim djelom, koje će realizovati u saradnji s Agencijom.

Osim ovih obuka organizovanih u suradnji s Centrom za edukaciju sudija i tužilaca Federacije Bosne i Hercegovine, Agencija je planom i programom predvidjela također još dodatnih obuka iz ove oblasti. S tim u vezi, Planom rada Agencije za 2020. godinu predviđena su određena finansijska sredstva za te namjene, međutim kako nam je odobren manji budžet od planiranog, u narednom periodu ćemo uputiti Vladi Federacije Bosne i Hercegovine zahtjev za izmjene i dopune Budžeta, u ovom pogledu.

Kako bi se dodatno unaprijedila implementacija aktivnosti vezanih za edukaciju u narednom periodu, Agencija je planirala važeći Pravilnik o unutrašnjoj organizaciji Agencije, prilagoditi novonastalim potrebama, odnosno uspostaviti još jedan dodatni sektor koji bi se bavio poslovima edukacije, koji je bio predviđen starim Pravilnikom o unutrašnjoj organizaciji, a novim je ukinut, iako je Agenciji imperativno data nadležnost članom 30. Zakona da obavlja stručnu edukaciju iz područja finansijskih istraga i oduzimanja imovinske koristi pribavljene krivičnim djelom, te u isti izvršiti preraspodjelu trenutno uposlenih iz drugih sektora, kao i izvršiti novo zapošljavanje adekvatnog stručnog osoblja.

#### **4.5. OPERATIVNI CILJ 5 – INICIRANJE IZMJENA I DOPUNA ZAKONSKIH I PODZAKONSKIH AKATA I DONOŠENJE PROVEDBENIH AKATA KOJI NORMATIVNO RAZRAĐUJU PROCES ODUZIMANJA I UPRAVLJANJA NEZAKONITO STEČENOM IMOVINOM**

Primjenom Zakona o oduzimanju nezakonito stečene imovine krivičnim djelom u Federaciji Bosne i Hercegovine ("Službene novine Federacije BiH", broj: 71/14), kao i podzakonskih propisa koji uređuju ovu oblast, uočeni su određeni nedostaci u pogledu istih u domenu upravljanja, kako privremeno, tako i trajno oduzetom imovinom, te je shodno tome na bazi praktičnih iskustava u radu Agencije na ovim poslovima, Agencija 2017. godine sačinila radnu verziju izmjena i dopuna predmetnog zakona, te ga uputila u dalju proceduru usvajanja.

Međutim, s obzirom na to da je od podnošenja ovog propisa u proceduru usvajanja proteklo skoro dvije godine, a da isti još uvijek nije usvojen ni u formi nacрта, to je Agencija u izvještajnom periodu pokrenula dodatne aktivnosti na pripremi nove radne verzije ovog zakona, s obzirom na to da je praksa u međuvremenu pokazala dodatne stvari koje je neophodno zakonom definisati, kako bi sistem oduzimanja nezakonito stečene imovine i upravljanje njome, bio što efikasniji.

U tom pogledu, u izvještajnom periodu urađena je komparativna analiza propisa o upravljanju oduzetom imovinom i to zakona koji uređuju ovu oblast u bh. entitetu



Republika Srpska, kao i susjednim državama: Srbiji, Crnoj Gori i Hrvatskoj. Navedena komparativna analiza urađena je s ciljem da se uoče sličnosti i razlike u pogledu određenih rješenja koja se odnose na: status organa koji upravlja oduzetom imovinom, definiciju samog pojma „upravljanje“, zatim mogućnost prodaje privremeno oduzetih pokretnih stvari, nekretnina, upravljanje privremeno oduzetim hartijama od vrijednosti, poslovnim udjelima, zatim mogućnost davanja na korištenje i čuvanje privremeno oduzete imovine, davanje u zakup privremeno oduzetih nekretnina, modaliteti upravljanja trajno oduzetom imovinom, kao i pitanje postupka za naknadu štete prouzrokovane privremenim oduzimanjem imovine.

Shodno navedenom, radna verzija izmjena i dopuna Zakona o oduzimanju nezakonito stečene imovine krivičnim djelom u Federaciji Bosne i Hercegovine na jasan način definiše:

1. Izvršenje sudskih odluka o oduzimanju imovine – fizičko oduzimanje i ulazak u posjed imovine (koji organ i na koji način);
2. Modalitete upravljanja privremeno oduzetom imovinom (mogućnost prodaje, najma i davanja na korištenje privremeno oduzete imovine, prvenstveno motornih vozila);
3. Modalitete upravljanja trajno oduzetom imovinom (prodaja, najam, zakup, korištenje, poklon humanitarnim organizacijama, sportskim klubovima i slično).

Pored navedenog, namjera je da se predmetnim izmjenama i dopunama Zakona proširi nadležnost Agencije i na upravljanje predmetima krivičnih djela i predmetima i imovinskom koristi pribavljenim izvršenjem prekršaja. U tu svrhu izvršena je komparativna analiza propisa koji uređuju ovu oblast u bh. entitetu Republika Srpska, te državama: Srbija, Crna Gora i Hrvatska, i to u pogledu organa koji upravljaju oduzetim predmetima krivičnog djela. Analiza je pokazala da navedeni pravni sistemi na sličan način propisuju način postupanja oduzetim predmetima krivičnog djela, odnosno organi nadležni za upravljanje oduzetom imovinom ujedno upravljaju i oduzetim predmetima krivičnog djela.

Također, izvršena je analiza zakonskih i podzakonskih propisa u Federaciji Bosne i Hercegovine koji se tiču ove problematike, i to: Krivičnog zakona Federacije Bosne i Hercegovine, Zakona o krivičnom postupku Federacije Bosne i Hercegovine, te Pravilnika o načinu i uslovima čuvanja materijalnih dokaza.

Shodno navedenom, u tekst radne verzije izmjena i dopuna predmetnog Zakona propisana je nadležnost Agencije da upravlja predmetima krivičnog djela i prekršaja.

Na ovaj način bi se sistemski riješio problem upravljanja oduzetim predmetima krivičnog djela, te ujednačila praksa postupanja u ovoj oblasti u Federaciji Bosne i Hercegovine, a istovremeno bi se izvršilo i uskađivanje sa Direktivom 2014/42/EU Evropskog parlamenta i Vijeća Evropske unije o zamrzavanju i oduzimanju predmeta i imovinske koristi ostvarene krivičnim djelima u Evropskoj uniji.

U ovom izvještajnom periodu Agencija nije donosila podzakonske akte iz oblasti upravljanja oduzetom imovinom iz razloga što je njihovo donošenje uslovljeno izmjenama i dopunama predmetnog Zakona. U tom pogledu previđeno je da se Zakonom izričito propiše, da će se donijeti podzakonski propis koji će detaljno



propisati poslove upravljanja oduzetom imovinom. Shodno tome, uporedo s izradom radne verzije izmjena i dopuna predmetnog Zakona, egzistira i radna verzija predmetnog podzakonskog propisa koji će stupiti na snagu nakon usvajanja izmjena i dopuna Zakona.

U skladu sa Zakonom o razvojnom planiranju i upravljanju razvojem u Federaciji Bosne i Hercegovine („Službene novine Federacije BiH“, broj: 32/17), a na osnovu Odluke Vlade Federacije Bosne i Hercegovine o izradi Strategije razvoja Federacije Bosne i Hercegovine za period 2021 – 2027. godine, predstavnici Agencije su u izvještajnom periodu, kao članovi tematske podgrupe 9. Korupcija, dobro upravljanje i javne usluge prisustvovali na dvije radionice.

U okviru prve radionice je izvršena analiza snaga i slabosti, kao i unutrašnji i vanjski faktori koji utiču na unapređenje institucionalnog, strateškog i normativnog okvira sa ciljem efikasnijeg suprostavljanja korupciji u Federaciji Bosne i Hercegovine.

Druga radionica se održala u okviru tematske grupe: Dobra i inkluzivna uprava, na kojoj su dogovorene mjere u okviru podgrupe 9. koje će se provoditi u Federaciji Bosne i Hercegovine, i to:

- Uspostava profesionalnih struktura za suprostavljanje korupciji;
- Razvoj strateškog planiranja i digitalizacija antikorupcije;
- Razvoj efikasnog sistema prevencije korupcije;
- Unapređenje pružanja javnih usluga;
- Digitalizacija javne uprave;
- Uspostava funkcionalne i racionalne organizacije javne uprave;
- Uspostavljanje odgovornosti i transparentnosti u poslovanju javnih preduzeća.

U izvještajnom periodu predstavnik Agencije je prisustvovao Pripremnom sastanku Delegacije Bosne i Hercegovine koji je održan u prostorijama Misije Bosne i Hercegovine u Briselu i četvrtom sastanku Pododbora za pravdu, slobodu i sigurnost između Evropske unije i Bosne i Hercegovine održanom u zgradi Evropske komisije u Briselu. Tom prilikom predstavnik Agencija je sačinio Doprinos za diskusiju za IV sastanak Evropske unije – Bosne i Hercegovine, Pododbora za pravdu, slobodu i sigurnost, te je u skladu sa istim obrazložio rad i dosadašnje rezultate Agencije predstavnicima Evropske komisije.

Također, u okviru poglavlja 24. Pravda sloboda i sigurnost pod tačkom 21. Federalna agencija za upravljanje oduzetom imovinom je dostavila Uredu Vlade Federacije Bosne i Hercegovine za evropske integracije prijedlog mjera za realizaciju prioriteta Agencije s rokovima realizacije koji su uvršteni u Akcioni plan za realizaciju prioriteta iz Analitičkog izvještaja Evropske komisije:

1. Organizovanje edukacija i obuka profesionalaca iz pravosuđa, agencija za provođenje zakona i drugih nadležnih institucija u Federaciji Bosne i Hercegovine u oblasti oduzimanja imovinske koristi pribavljene krivičnim djelom (tri obuke);
2. Pokretanje procedure za donošenje Zakona o izmjenama i dopunama Zakona o oduzimanju nezakonito stečene imovine krivičnim djelom u Federaciji Bosne i Hercegovine;



3. U saradnji s Visokim sudskim i tužilačkim vijećem omogućiti Federalnoj agenciji za upravljanje oduzetom imovinom pristup CMS/TCMS modulu za evidenciju oduzimanja imovinske koristi stečene krivičnim djelom u svrhu sačinjavanja analiza iz nadležnosti Agencije;
4. Jačanje saradnje s tužilaštvima, sudovima, Sudskom policijom Federacije Bosne i Hercegovine, Federalnom upravom policije, kao i Federalnim pravobranilaštvom kroz organizovanje zajedničkih sastanaka radi razmjene informacija vezanih oko pitanja koja reguliše Zakon o oduzimanju nezakonito stečene imovine krivičnim djelom u Federaciji Bosne i Hercegovine.

Agencija u okviru ovih predloženih mjera redovno izvještava Ured Vlade Federacije Bosne i Hercegovine za evropske integracije o realizovanim aktivnostima.

Na osnovu Zakona o zaštiti ličnih podataka („Službeni glasnik BiH“, br. 49/06, 76/11 i 89/11) i Pravilnika o načinu čuvanja i posebnim mjerama tehničke zaštite ličnih podataka („Službeni glasnik BiH“, broj 67/09), Agencija je u izvještajnom periodu također izradila evidencijske obrasce o zbirkama ličnih podataka koje vodimo, te iste dostavili Agenciji za zaštitu ličnih podataka. Nakon izvršene provjere obrade koje bi mogle dovesti do povrede prava nositelja podatka, Agencija za zaštitu ličnih podataka je dala saglasnost na iste. Nakon dobivene saglasnosti, Agencija je na osnovu korisničke šifre za unos (dobijene od strane Agencije za zaštitu ličnih podataka) izvršila unos podataka iz 12 evidencija u Glavni registar Agencije za zaštitu ličnih podataka.

Navedeni strateški ciljevi i aktivnosti Agencije u 2019. godini su u cijelosti bili usklađeni s odobrenim finansijskim sredstvima u Budžetu Federacije Bosne i Hercegovine za 2019. godinu.

## **5. BUDŽET AGENCIJE**

Budžetom Federacije Bosne i Hercegovine („Službene novine Federacije BiH“, broj 11/19) Federalnoj agenciji za upravljanje oduzetom imovinom za 2019. godinu odobreno je 801.941,00 KM.

Rashodi Agencije namijenjeni su za finansiranje plaća, doprinosa i naknada troškova zaposlenih, tekućih izdataka i materijalnih troškova, te nabavku i održavanje stalnih sredstava.

Obezbjedenjem navedenih finansijskih sredstava stvoreni su uvjeti za pravilno i zakonito vođenje materijalnog i finansijskog poslovanja Agencije.



## Pregled utrošenih sredstava iz Budžeta Agencije na 31. 12. 2019. godine

### Rashodi i izdaci

Ekonomski kod	Opis	Izvršenje za period 1. 7 - 31. 12. 2019. (izražen u KM)
1	2	3
	<b>UKUPNO RASHODI I KAPITALNI IZDACI</b>	<b>352.481</b>
	<b>UKUPNO RASHODI</b>	<b>337.804</b>
6111	Bruto plaće i naknade	189.039
6112	Naknade troškova zaposlenih	20.249
6121	Doprinosi poslodavca	20.238
6131	Putni troškovi	5.592
6132	Izdaci za energiju	4.400
6133	Izdaci za komunikaciju i komunalne usluge	4.483
6134	Nabavka materijala i sitnog inventara	12.606
6135	Izdaci za usluge prevoza i goriva	4.495
6136	Unajmljivanje imovine, opreme i nemat. Imovine	18.937
6137	Izdaci za tekuće održavanje	10.527
6138	Izdaci za osiguranja, bankarskih usluga i usl. pl. pr.	7.956
6139	Ugovorene i druge posebne usluge	39.282
	<b>UKUPNO KAPITALNI IZDACI</b>	<b>14.677</b>
8213	Nabavka opreme	14.677

### 6. RAČUN POSEBNIH NAMJENA KOJIM UPRAVLJA AGENCIJA

Na osnovu primjene Zakona o oduzimanju nezakonito stečene imovine krivičnim djelom i sudskih odluka po kojima postupa, Agencija u okviru svojih nadležnosti upravlja privremeno i trajno oduzetom imovinom. Jedan dio imovine kojom Agencija trenutačno upravlja je i gotov novac koji je na osnovu sudskih odluka privremeno oduzet i povjeren Agenciji na upravljanje. Osim gotovog novca koji je privremeno oduzet i povjeren Agenciji na upravljanje, Agencija upravlja i novcem stečenim zakupninama od nekretnina koje su također povjerene Agenciji na privremeno upravljanje, a koje se izdaju pod zakup.

Sav taj novac nalazi se u banci na računu posebnih namjena koji je Agencija otvorila kod Union banke d.d. Sarajevo, a na osnovu dobijenog Mišljenja Federalnog ministarstva finansija broj: 07-14-4-1189/18 od 6. 3. 2018. godine.

Račun za posebne namjene je od izuzetne važnosti prije svega jer se na njega polažu novčani iznosi koji su privremeno oduzeti od vlasnika na osnovu sudskih odluka, tj. rješenja o određivanju privremenih mjera, i koji na istom ostaju sve dok sud ne donese konačnu pravosnažnu presudu, od čijeg karaktera ovisi da li će predmetna novčana sredstva postati prihod Federacije Bosne i Hercegovine ili će se ista vratiti vlasniku. Deponovanjem predmetnih novčanih sredstava na račun posebnih namjena postiže se svrha Zakona, tj. osiguranje novčanih sredstava radi osiguranja naplate potraživanja Federacije Bosne i Hercegovine eventualno utvrđenog naknadno donesenom pravosnažnom presudom.



Pored navedenog, kako smo već naveli, na računu za posebne namjene, polažu se i zakupnine koje plaćaju zakupci nekretnina koje su sudskim odlukama Agenciji povjerene na privremeno upravljanje.

Na računu posebnih namjena se trenutno nalazi iznos od **1.159.732,36 KM**, kako je prikazano u sljedećoj tabeli:

Konto	Valuta	Stanje	Stanje u KM
5301110800 (001)	KM	946.918,50	946.918,50
5301110800 (001)	EUR	108.810,00	212.813,86
<b>UKUPNO:</b>			<b>1.159.732,36</b>

Od ukupnog novčanog iznosa koji se nalazi na računu posebnih namjena kojim upravlja Agencija, iznos od **413.586,56 KM** se odnosi na zakupnine nekretnina koje Agencija izdaje pod zakup, dok su ostala sredstva povjerena na čuvanje i upravljanje Agenciji, kao privremena mjera osiguranja nezakonito stečene imovine krivičnim djelom. Pregled visine zakupnina za nekretnine koje su privremeno oduzete i povjerene Agenciji na upravljanje u izvještajnom periodu:

NEKRETNINA	MJESEČNI IZNOS ZAKUPNINE	IZNOS ZAKUPNINE ZA PERIOD OD 1. 7 - 31. 12. 2019. godine
Ambasada Kraljevine Švedske	11.000,00 KM	66.000,00 KM
„Amoniq“ d.d. Zenica	2.955,83 KM	17.734,98 KM
<b>UKUPNO</b>	<b>13.955,83 KM</b>	<b>83.734,98 KM</b>

Sva novčana sredstva koja se nalaze na računu za posebne namjene kojim raspolaže Agencija će u trenutku kada se krivični postupci okončaju na način da imovina stečena krivičnim djelom bude trajno oduzeta biti uplaćena u Budžet Federacije Bosne i Hercegovine u skladu s Pravilnikom o izmjenama i dopuni Pravilnika o načinu uplate javnih prihoda budžeta i vanbudžetskih fondova na teritoriji Federacije BiH („Službene novine Federacije BiH“, broj 9/17) pod stavkom „Novčana sredstva po osnovu primjene Zakona o oduzimanju nezakonito stečene imovine krivičnim djelom u Federaciji BiH – vrsta prihoda 723 143.

## 7. PRIJEDLOG MJERA ZA UNAPREĐENJE RADA AGENCIJE

Planom rada Agencije za 2019. godinu, kao mogući problemi i rizici prilikom realizovanja aktivnosti predviđenih **Operativnim ciljem 1 - Očuvanje vrijednosti oduzete imovine** navedena su ograničena budžetska sredstva u smislu da čuvanje i održavanje pojedinih oblika privremeno oduzete imovine iziskuje veće troškove održavanja.

Kako bi prevazišli navedeni problem, Agencija će u skladu sa zakonskim odredbama predlagati Vladi Federacije Bosne i Hercegovine donošenje Odluka o priznavanju i plaćanju troškova upravljanja, raspolaganja i uništenja imovine ili zahtjev za izmjenama i dopunama Budžeta za 2020. godinu.



Kao mogući problem i rizik u realizaciji **Operativnog cilja 2 – Učinkovito postupanje trajno oduzetom imovinom** navedeno je neusvajanje zakonskih i podzakonskih odredbi koje regulišu pitanje korištenja trajno oduzete imovine. Problem vezan za ovaj operativni cilj, kao i prethodni, a radi kvalitetnijeg i efikasnijeg upravljanja oduzetom imovinom je neophodno usvojanje izmjena i dopuna Zakona o oduzimanju nezakonito stečene imovine krivičnim djelom u Federaciji Bosne i Hercegovine.

Kao jedan od problema koji su uočeni kod realizacije aktivnosti iz ova dva operativna cilja je kadrovska popunjenost Sektora za preuzimanje i upravljanje oduzetom imovinom, što je detaljnije objašnjeno u tački 3. izvještaja – Rukovođenje i organizacija Agencije.

Naime, kadrovska popunjenost ovog sektora ne odgovara stvarnim potrebama i radnim zadacima koje on obavlja u okviru svojih nadležnosti. U trenutku izvještavanja u Sektoru je u ovom momentu zaposlena samo jedna osoba sa završenim ekonomskim fakultetom i to na poziciji rukovodećeg državnog službenika, odnosno pomoćnika direktora koji rukovodi tim sektorom.

Ostali zaposleni u Sektoru za preuzimanje i upravljanje su državni službenici na poziciji stručnog savjetnika sa školskom spremom dipl. pravnik, dipl. kriminalist i dipl. politolog, što trenutno ne odgovara stvarnim zahtjevima Agencije, naročito u kontekstu upravljanja privrednim subjektima.

Radi prevazilaženja navedenih problema, neophodno je važeći Pravilnik o unutrašnjoj organizaciji Agencije prilagoditi novonastalim potrebama, te izvršiti preraspodjelu trenutno uposlenih, kao i izvršiti novo zapošljavanje adekvatnog stručnog osoblja.

Kao jedan od problema koji se pojavljuje prilikom upravljanja privremeno a u pojedinim slučajevima i trajno oduzetom imovinom je i problem skladištenja ove vrste imovine. Naime, zbog specifičnosti poslova koji se obavljaju u Agenciji, a koji zahtjevaju cjelodnevnu mogućnost pristupa skladišnim kapacitetima, kao i osiguranje istih, Agenciji je potreban prostor koji će omogućiti 24-satno obezbjeđenje.

Radi obezbjeđenja uvjeta za zaštitu i očuvanje vrijednosti oduzete imovine koja se odnosi na privremeno oduzeta novčana sredstva, kao i razne dragocjenosti, Agenciji je također potreban sef, koji bi imao 24-satni nadzor i fizičku zaštitu, te koji bi ujedno bio na raspolaganju službenicima Agencije u svakom trenutku, a s ciljem efikasnog upravljanja istim.

Jedna od predloženih mjera za rješavanje ovog problema bila bi obezbjeđenje novog prostora za smještaj Agencije, koji bi raspolagao dovoljnim skladišnim kapacitetima za smještaj privremeno oduzetih vozila, kao i drugih vrsta imovine, kao i sefom u kojem bi se čuvale dragocjenosti i novac, nad kojim bi ovlaštene osobe imale cjelodnevni nadzor.

Planom rada Agencije za 2019. godinu, kao mogući problem i rizik u realizaciji **Operativnog cilja 3 - Provođenje analiza u području oduzimanja imovinske koristi pribavljene krivičnim djelom** navedena je nedovoljno ostvarena saradnja s



nadležnim sudovima i tužilaštvima, te nedostatak finansijskih sredstava neophodnih za realizaciju planiranih aktivnosti.

Naime, u Sektoru za analizu, planiranje i izvještavanje trenutno je uposlena samo jedna osoba i to rukovodeći državni službenik na poziciji pomoćnika direktora tog sektora.

Kako je u ovom izvještajnom periodu Agencija ostvarila značajne kontakte s međunarodnim institucijama i organizacijama o pitanjima oduzimanja nezakonito stečene imovine krivičnim djelom, te sve većeg broj zahtjeva od strane istih, a koji rezultiraju velikim brojem sastanaka sa istim, te mnogobrojnih projekata finansiranih od Evropske unije, kao i članstva u Međuagencijskoj balkanskoj mreži za upravljanje oduzetom imovinom, potrebno je izvršiti popunu radnog mjesta prevodioca koji je trenutno sistematizovan u Sektoru za analizu, planiranje i izvještavanje.

Također, Direktiva Evropskog parlamenta i Vijeća Evrope 2014/42/EU o zamrzavanju i oduzimanju predmeta i imovinske koristi ostvarene krivičnim djelima u Evropskoj uniji od 3. 4. 2014. godine, nalaže prikupljanje, obradu i objavljivanje podataka o nezakonito stečenoj imovini krivičnim djelom, te u skladu s tim Agencija provodi navedene aktivnosti u saradnji sa svim sudovima i tužilaštvima u Federaciji Bosne i Hercegovine, kao i Visokim sudskim i tužilačkim vijećem. Kako trenutno s istim provodimo zajedničke aktivnosti oko informatičke uvezanosti u vezi navedenih podataka, neophodno je da se obezbijede licence za korištenje informacionih sistema, kao i da se izvrši popuna upražnjenog radnog mjesta informatičara.

Kao problem i rizik u realizaciji **Operativnog cilja 4 - Unapređenje saradnje i koordinacije između Agencije, pravosudnih organa, policijskih agencija i drugih institucija koje imaju obavezu postupati prema odredbama Zakona, kao i drugih pravnih subjekata u Bosni i Hercegovini, te uspostavljanje i unapređenje saradnje sa istim ili sličnim agencijama iz zemalja regije i Evropske unije, kao i kontinuirana edukacija uposlenika navedenih institucija koji su direktno u vezi sa procesom oduzimanja nezakonito stečene imovinske koristi** naveden je mogući nedostatak finansijskih sredstava za realizaciju ovog operativnog cilja.

Kao jedan od glavnih problema u realizaciji ovog cilja u izvještajnom periodu jeste i trenutna unutrašnja organizacija Agencije u kojoj nije sistematizovan sektor za edukaciju koji bi obavljao poslove iz nadležnosti Agencije koje su joj propisane zakonom, a koje se odnose na stručnu edukaciju iz oblasti finansijskih istraga i oduzimanja imovinske koristi.

Naime, starim Pravilnikom o unutrašnjoj organizaciji ovaj sektor je postojao, te je novim Pravilnikom isti ukinut, iako je članom 30. Zakona Agenciji imperativno data nadležnost da obavlja stručnu edukaciju iz područja finansijskih istraga i oduzimanja imovinske koristi pribavljene krivičnim djelom.

Kako bi se ovaj problem riješio, te dodatno unaprijedila implementacija aktivnosti vezanih za edukaciju u narednom periodu, Agencija je planirala važeći Pravilnik o unutrašnjoj organizaciji Agencije prilagoditi novonastalim potrebama, odnosno uspostaviti još jedan sektor koji bi se bavio poslovima edukacije, te u isti izvršiti



preraspodjelu trenutno uposlenih iz drugih sektora, kao i izvršiti novo zapošljavanje adekvatnog stručnog osoblja.

S obzirom na činjenicu da su mnoge institucije u Akcionom planu za realizaciju prioriteta iz analitičkog izvještaja Evropske komisije navele mjere kojima se povećavaju aktivnosti oko provođenja finansijskih istraga i oduzimanja imovinske koristi pribavljene krivičnim djelom u toku 2020. godine, s posebnim osvrtom na edukaciju iz ovih oblasti koje Agencija planira realizovati u narednom periodu, Agencija će u narednom periodu uputiti zahtjev za izmjene i dopune Budžeta, odnosno zahtjev za odobravanje dodatnih finansijskih sredstava za realizaciju ovih aktivnosti.

Kao mogući problem i rizik u realizaciji **Operativnog cilja 5 – Iniciranje izmjena i dopuna zakonskih i podzakonskih akata i donošenje provedbenih akata koji normativno razrađuju proces oduzimanja i upravljanja nezakonito stečenom imovinom** navedeno je neusvajanje predloženih zakonskih i podzakonskih akata.

Prijedlog mjera Agencije za otklanjanje ovog problema je pokretanje inicijative za izradu izmjena i dopuna zakonskih i podzakonskih akata, te donošenje provedbenih akata koji normativno razrađuju proces oduzimanja i upravljanja nezakonito stečenom imovinom. Istvremeno s ovom aktivnošću Agencija će pokrenuti izmjene i dopune postojećeg Zakona o krivičnom postupku Federacije Bosne i Hercegovine, kao i Zakona o izvršnom postupku Federacije Bosne i Hercegovine radi usklađivanja postojećih odredbi navedenih zakona s odredbama Zakona o oduzimanju nezakonito stečene imovine krivičnim djelom.

Realizacijom ovog operativnog cilja pospiješit će se, odnosno unaprijediti proces upravljanja oduzetom imovinom, kako bi se isto odvijalo na transparentan, efikasan način, koji garantira zaštitu javnog interesa i odvija se u korist društvene zajednice.

Pored navedenog, u Sektoru za pravne, kadrovske, opće i materijalno finansijske poslove neophodno je izvršiti popunu upražnjenih radnih mjesta predviđenih važećim Pravilnikom koji se odnose na pravne i ekonomske poslove, a s ciljem adekvatne podrške u obavljanju stručnih poslova koji se odnose na upravljanje oduzetom imovinom.

Agencija će u narednom periodu nastaviti provoditi aktivnosti koje će se odnositi na otklanjanje uočenih problema. Također, istovremeno, će raditi i na daljem unapređenju rada i poslovanja Agencije, kao i ispunjavanje zakonom predviđenih nadležnosti, a koje se odnose na preuzimanje i upravljanje oduzetom imovinom, te sačinjavanje analiza i stručnu edukaciju.

Broj: 01-02-9/2020/HK

Sarajevo, 10. 1. 2020. godine



v. d. DIREKTOR

doc. dr. sci. Vinko Jakić